

ጳውሎስ ኦርሜ አሳሰ ፃፊዳ ኪታ ገደ ቆፋ

ሃዋሬ ጳውሎስ ኪታይ ኦርሜ አሳሰ ፃፊቱዳይ ጳውሎስ ኦርሜን ዲዛ ዋሳ ከላዮ ጋኪ ቤያናሰ ቆፐዳ ገሽ ኢሰቲ ኢዛ ገጌቲ ናጋና ማላ ኤሪሳናሲኮ። ጳውሎስ ዲዛ ቆፋይ ኦርሜን ዲዛ አማኒዛ አሳራ ጉላ ዎዴ ኦሊዳፔ ጉዬ ኢሰቲ ኢዛ ማዲኮ ኢዚ ጌዴ ኢሰፔኔ ቢታ ባናሰኮ። ኢዚ ባሲ ጌሊዳ ማላ ኢሰታሰካ አማኖይ ጌሊን አማኒዛይቲ ባ ዲሳን አማኖ ቤሳና ማላ አማኖ ቲሚርቲ ሃኖ ኢሰታሰ ወርሲ ቢርሽ ፃፊዴሰ። ጳውሎስ ኪታይ ኩሜል ገዲ ቤቲዳይ ሃይሳ ሃ ኪታዛኒኮ።

ጳውሎስ ኦርሜን ዲዛ አማኒዛ አሳሰ ባ ሳርካ ዬዲዳፔኔ ኢሰታሰ ኢዚ ዋሳና ቃላ ጌሊዳፔ ጉዬ ባ ኪታሰ ዋና አይፊ ዮዮ (1:17) “ፆሳፊ ቤቲዛ ሂሎቴል አማኖኔ አማኖሰ ገዲዳ ማላ ሚሺራቾ ቃላን ቆንጨዴሰ” ገዛ ቃላ ገዲዳይሳ ቤሴሰ።

ሄሳፊ ጉዬ ጳውሎስ ሃይሳ ሃ ቆፋዛ ጉጂ ኣሲ ፃፊሰ። አይሁዳታካ ገዲን ዎይኮ ሃንኮ ዴሬ ኣሳ ገዲን ኣሲ ወርካ ናጋራሰ ሃራቲዳ ገሽ ፆሳራ ኢሊንታናሰ ቤሴሰ። ኣሳይ ፆሳራ ኢሊንታናሰ ዳንዳዪዛይ ዬሱሰ ኪርሰቶሳን አማኖና። ሄሲ ኣሳይ ፆሳራ ዶሚዳ ኦራላ ኢሲፊቴላ አይፊይ ኦራላ ዴዮ ገዲዳይሳ ጳውሎስ ሎዔል ኤሪሴሰ። አማኒዛዴይ ፆሳራ ሳርን ዴዔሰ፤ ፆሳ ኣያና ባጋራ ሄሳዴይ ናጋራፔኔ ሃይቆ ዎልቃፊ ዎዜቴሰ፤ ሽዎፖ 5-8 ጋካናሰ ጳውሎስ ፆሳ ዎጋ ገሽኔ አማኒዛይታ ዴዮን ኦሊዛ ፆሳ ሂሎ ኣያናሰ ቆፋይ ኣዛኮኔ ቆንጨሴሰ። ቃሴካ ጉጂዲ ጳውሎስ “ኣሳ ዜሬላ ገሽ ፆሳሰ ዲዛ ቆፋ ገደን አይሁዳይኔ አይዛቤይ ኢሲፊ ኦይኬታናሰ ዳንዳዪዬ?” ገዛ ኦይሾሰ ዛር ኢማናሰ ባፃቴሰ።

ቃሴካ ጳውሎስ ቆንጨሲዳ ማላ አይሁዳቲ ዬሱሳ አማኖንታ ኣቲዳይ ፆሳ ቆፋ ማላ። ሄሲካ ሃኒዳይ ዬሱሰ ኪርሰቶሳ ባጋራ ዶሲ ቆንጨሲዳ ኢዛ ኣቶቴላ ኪያን ኩሜል ኣሳ ዜሬል ወርካ ጋኪ ኤካና ጋላናሳ። ገደ ኣቲን አይሁዳ ኣሳይ ዬሱሳን አማኖና ዎዴይ ያናይሳ ጳውሎስ አማኒሰ። ወርሴላን ጳውሎስ አማኖን ዋኒ ዴያናኮኔ ሃራፔካ አማኒዛይቲ ባ ጋርሳን ባሲ ዲዛ ጋይቶቴላን

ሲቆ ኦጌ ካላናሰ በሲዛይሳ ኢሰታ ኤሪሴሰ። ጉጂዲካ ኢሰታሰ ያሳ ኦሶ ጊሽ ኣማኒዛይቲ ባ ዴሬ ጊሽ፣ ባ ጋርሳን ኢሶይ ኢሳ ናጋናሰ በሲዛ ኣላፊቴላ ጊሺኔ ቆፋፔ ዴንዲዛ ኦይሻታ ወርሲ ሁዔን ሁዔን ኤሪሴሰ።

- ሃ ማፃፋይ ኦይኪዲ ኩሜላ ቆፋ
- ሃ ማፃፋዚ ኦይኪዲ ኣይፌ ቆፋታ 1:1-17
- ኣሳ ናሰ ኣቶቴላ ኮሼሰ 1:18-3:20
- ፆሲ ኣሳ ና ኣሺዛ ኦጌ 3:21-4:25
- ኪርሰቶሳ ባጋራ በቲዛ ኦራላ ዴፆ 5:1-8:39
- ኢሰራዔሌ ኣሳይ ያሳ ቆፋ ጋርሳን 9:1-11:36
- ኣማኒዛ ኣሳ ሎፆ ኦሶ 12:1-15:13
- ወርሴላ ሳሮካ 15:14-16:27

1 ዩሱስ ኪርሰቶሳ ኣይሌኔ ሃዋሬ ጊዳናሰ ፃይጌቲዳ ሚሺራቾ ቃላ ዮታናሰ ጳውሎሳፔ ኪቴቲዳ ኪታ።

2 ሄ ሚሺራቾ ቃላ ጊሽ ካሴ ናቤታ ባጋራ ጌሻ ማፃፋታን ኡፋይሲ ኢሜቲዴሰ። 3 ሚሺራቾ ቃላይካ ባ ናዛ ጊሽ ኢዚ ኣሾ ባጋራ ዳወቲ ዜሬላፌ ጊዲዳይሳ ዮቲዛ ጊሻሳ። 4 ሄሳታካ ኦ ጎዳ ዩሱስ ኪርሰቶሲ ባ ጌሻቴላ ኣያናን ሃይቆፔ ዴንዲዳይሲ ኢዚ ያሳ ና ጊዲዳይሲ ጊታ ዋልቃን ቆንጨዴሰ። 5 ኪርሰቶሳ ሱንሳ ጊሽ ኣማኖንታ ዴሬይ ኣማናና ማላኔ ኣዛዜታና ማላ ኢዛ ባጋራ ኦኒ ሃዋራቴላሰ ጋሊዛ ኪያቴላ ኤኪዶሰ። 6 ኢንቴካ ዩሱስ ኪርሰቶሳይታ ጊዳና ማላ ፃይጌቲዳይታራ ዴታ።

7 ያሳን ዶሴቲዳይታኔ ጌሻታ ጊዳናሰ ፃይጌቲዳ ኦሮሜ ቢታን ዲዛ ኢንቴሰ ኡባሰ ኦ ኣዋ ያሳፊኔ ኦ ጎዳ ዩሱስ ኪርሰቶሳፔ ኪያቴላኔ ሳሮቴላ ኢንቴሰ ጊዶ።

ጳውሎሲ ኦሮሜ በያና ላሞቲዴሰ

8 ኢንቴ ኣማኖይ ኣላሜ ኩሜላን ሲዩቲዳ ጊሺኔ ኢንቴ ጊሽ ታ ጎዳ ያሳ ዩሱስ ኪርሰቶሳ ባጋራ ጋላታይሰ። 9 ታ ኢንቴ ጊሽ ኡባ ዋዴ ኣይ ማላ ቆፐዛኮኔ ያሳ ና ሚሺራቾ ሳባኮን ታ ኩሜላ ዋዘናፔ ኢዛሰ ኦሊዛ ያሳይ ታሰ ማርካ። 10 ታኒ ታ ዋሳን ኡባ ዋዴ ኢንቴና ቆፓይሰ። ሃዒ ቃሴ ወርሴላን ያሳ ሺኔ ጊዲኮ ታ ኢንቴኮ ባና ማላ ያሲ ታሰ ኦጌ ዶያና ማላ ያሳይሰ። 11 ኢንቴ ሚናና ማላ ማዲዛ ኣያና ኢሞቴላ ታ ኢንቴሰ ጊሻናሲኔ ኢንቴና ኣይፌራ በያናሰ ላሞታይሰ። 12 ሄሲካ ኢንቴኔ ታኒ ኢሶይ ኢሳራ ኣማኖን ሚኔታናሳ።

13 ታ ኢሻቶ! ሃራሶን አማኖንታይታ ማታን ታስ ሃኒዳ ማላ ኢንቲ ማታንካ ታስ ኦሶ አይፊይ ቤታና ማላ ዳር ዋዴ ቆፓዲሰ ሺን ሃኖ ጋካናሰ ታ ዲጌታዳ ዲዛይሳ ኢንቲ ኤራና ማላ ኮያይሰ።

* 14 ታማሪዳይታሰ ገዲን ታማርንታይታሰካ፤ ኤራታሲኔ ኤያታሰ ኡባሰ ታ ቦላ ታማርሳና ኣጮይ ዴሰ። 15 ኢንቲሰ ኦሮሜን ዲዛይታሲካ ታ ሚሺራቾ ቃላ ዮታናሰ ታ አሞቲዛይ ሄሳሳ።

16 አማንዛይቲ ወሪ አታና ማላ ያሳ ዋልቃ ገዲዳ ገሽ ታ ሚሺራቾ ቃላን ዬላቲኬ፤ ሄሲካ ኮይሮ አይሁዳታሰ ካሊዲ አይዛቤታሳ። * 17 “ዲሎይ ያሳ አማኖን ዴሰ” ጌቲቲዲ ካሴ ያፌቲዳ ማላ ያሳ ዲሎቴሰ ሚሺራቾ ቃላን ቆንጩና፤ ሄ ዲሎቴሰ ኮይሮ፤ ወርሴሰ ጋካናሰ አማኖን ሃናና። *

አሳ ናይታ ኢታቴሰ

18 ቱማ ባ ኢታቴሳኒ ማካላን ቱጪ ኦይኪዛይታ ኢታቴሰ ቦላኒ ኢሰታ ማካላቴሰ ኡባ ቦላ ያሳ ሃንቆይ ሳሎፔ ቆንጩና።

19 ኢሰቲ ኤራናሰ ቤሲዛዚ ያሲ ወርሲ ኢሰታሰ ቆንጩሲዳ ገሽ ኢሰቲ ያሴ ኤራናሰ ቆንጩ። 20 አላሜይ ሜዴቶሶፔ ሃ ሲሚን አሳ አይፊን ቤቲ ኤርንታ ያሳ ሃኖቴሰ ሄሲካ ኢዛሰ ዲዛ ሜርና ዋልቃይኔ ያሳቴሳይ ኢዚ ሜዲዳ ሜዴቴሳን ቆንጩን ቤቲሰ። ሄሳ ገሽ አሳይ ሸሻና ጋሶይ ዴና። 21 ኢሰቲ ያሴ ኤሪኮካ ኢዛ ያሳቴሰ ማላ ቦንቹቤቴናኔ ጋላቲቤቴና። ገዶ አቲን ኢሰታ ቆፋይ ማላ ጎዳይ ባይንዳዚ ገዲዳሴኔ ዩሺ ቆፖንታ ማላ ኢሰታ ዋዝናይ ዲሚዳሰ። * 22 ኢሰቲ ባና “ኤራ” ገዛይታ ገዲኮካ ኤያታ ገዲዳ። 23 ሜርና ያሳ ቦንቾ ሃይቁዛ አሳኒኔ ካፎታን፤ ሜሃታኒኔ ቢታ ቦላ ጎሽቲዛ ሜዴቴሳታን ሚሳቲሲዲ ላሚዳ። *

24 ሄሳ ገሽ ያሲ ኢሰታ ባ ገደን ኢሶይ ኢሳራ ባርካ ባ አሳቴሳን ቱና ኦሶ ኦላና ማላ ጌሻቴሰ ባይንዳ ላይማቴሳሰ አሌ ኢሚዳሰ። 25 ኢሰቲ ያሳ ቱማቴሰ ዋርዶን ላሚዳ፤ ሜዲዳ ያሳ ኢገዲ ሚዴቴሳሰ ጎይኒዳኔ ኢሰታሰ ኦሌዳ። ሜዲዳ ያሲ ኢዚ ሜርናሰ ጋላቴቲዳይሳ። አሚን።

26 ሄሳ ጌደን ያሲ ኢሰታ ዬላቹዛ አሞቴሳሰ አሌ ኢሚዳሰ። ኢሰቲ ማጫሳቲ ባናራ ዚንዳናሰ ቤሶንታይታራ ዚንዳና ማላ ባና አሌ ኢሚዳ። 27 ሄሳሶካ አቱማ አሳይ ባሲ ቤሲዛ ማጫሳታራ ዚንዳናሰ ቤሲሺን አዳይ አዳራ ዚንዳናሰ አሞን ፀጌቲዲ

* 1:13 ሃዋ 19:21 * 1:16 ማር 8:38 * 1:17 ኢብ 2:4 * 1:21

ኤፌ 4:17-18 * 1:23 ዛሬ 4:16-18

ማጫሳታራ ዚንዲዛ ማላ ኣዳይ ኣዳራ ዚንዲዲ ፓላ ሚሺ ኦሊዳ። ሄይታንቲ ባርካ ባ ኦሊዳ ኢታ ኦሶዛሰ ቤሲዛ ቂፃቲ ባ ቦላ ኤሂዳ።

28 ቃሴካ ኢሰቲ ባ ቆፋራ ያሴ ኤርይ ኑና ማዳና ገዳ ገሽ ኢሰቲ ኦላናሰ ቤሶንታይሳ ኦላና ማላ ያሴ ኢሰታ ጎዖንታ ቆፋሰ ኦሊ ኢሚዳሰ። 29 ኡባ ባጋራ ማካላኔ ኢታቲል። ዪቄኔ ኢታ ኦሶን ፃላላ ኩሚዳ፤ ቃናቲቲላን፣ ሸምፖ ዋጶን፣ ኦሻን፣ ባሌላኒኔ ጌኔን ኩሚዳይታ ቃሴካ ዚገርዛይታ ገዲዳ። 30 ኣሳ ሱንል ሞሪዛይታ፣ ያሳ ኢፃዛይታ፣ ኣሰ ጫይዛይታ፣ ኦቶራንታታኔ ጩቄቲዛይታ ገዲዳ፣ ኡባ ዋዴ ኢታ ኦላናሰ ኦጌ ኮዪዛይታ፣ ባና ዬሊዳይታሰ ኣዛዜቶንታይታ፣ 31 ዩሺ ቆፖንታይታ፣ ገዳ ቃላ ዛሪ ላሊዛይታ፣ ኣሳሰ ሚሹቶንታይታ፤ ሜንጻ ኢታታ። 32 ሄሳ “ኦሊዛይቲ ዉሪካ ሃይቃናሰ ቤሴሰ” ገዛ ያሳ ዋጋ ኢሰቲ ኤሪሼ ሄይታንታ ባሲ ኦሶ ፃላላ ገደንታ ሄሳሶካ ኦሊዛይታካ ሚንሌሌቲሰ።

2

ያሳ ፐርዳ

1 ሄሳ ገሽ ኔሮ ሃራ ቦላ ፐርዲዛይሶ ኔኒ ታ ሃኒ ጌዶን ኦላዲሰ ገዛ ጋሶይ ኔሰ ዳና። ኔ ሃራ ኣሳ ቦላ ፐርዲዛይሳን ኔርካ ኔሰ ኩናኔ ኤካሳ። ጋሶይካ ሃራ ኣሳ ቦላ ኔ ፐርዲዛይሳ ኔካ ዛራዳ ኢዛ ኦሊዛ ገሻሳ። * 2 ሃይታ ማላታ ኦሊዛ ኣሳታ ቦላ ያሳ ፐርዳይ ሊኬ ገዲዳይሳ ኑ ኤርሰ። 3 ሄሳ ገሽ ኔ ኣሳ ቦላ ፐርዳሼ ሄ ኔ ፐርዲዛይሳ ዛራ ኦሊዛዴ ገዲኮ ኔ ያሳ ፐርዳፌ ኬሳ ኤካ ኣታና ኔሰ ሚሳቲዜ? 4 ዋይኮ ያሳ ኪያቲል ኔና ማርቲላኮ ካሌሊዛይሳ ሻካ ኤርንታ ዳሼ ኢዛ ገታ ኪያቲላኔ ኢዛ ዳንዳያ ዲሬቲላ ኔ ሌቃይ?

5 ገደ ኣቲን ኔኒ ኔ ዋዝና ሙሚቲላኒኔ ማርቲል ኮዮንታ ኔ ዋዝና ጌደን ቱማ ያሳ ፐርዳይ ቆንጨዛ ዋዴ ያሳ ሃንቆ ጋላሳሰ ኔ ቦላ ዳር ሃንቆ ሺሻሳ። 6 ያሴ ኢሳሰ ኢሳሰ ኢዛ ኦሶ ማላ ኢማና። * 7 ሎዖ ኦሶ ኣጎንታ ኦሊዲ ቦንቾ ሳባኔ ማርና ዴዖ ኮዪዛይታሰ ማርና ዴዖ ኢማና። 8 ገደ ኣቲን ባርካ ባና ደሲዛይታሰኔ ቱማ ኣጋገዲ ኢታ ካሊዛይታ ቦላ ፐርዳይኔ ሃንቆይ ጋካና። 9 ኢታ ኦሊዛ ኣይ ኣሳ ቦላ ኮይሮ ኣይሁዳ ኣሳ ቦላ ካሊዲ ኣይዛይታ ቦላ ዋዬይኔ ሜቶይ ጋካና። 10 ገዲኮካ

* 2:1 ማቶ 7:1፤ ሉቃ 6:37 * 2:6 ማዛ 62:12፤ ሉግ 24:12

ሎዎ ኦሊዛዴስ ኦናሰካ አይሁዳ አሳሰ ጊዲን አይዛቤታስ ሳባይ፡ ሳርቴላኔ ቦንቾይ ጊዳና። 11 ያሲ ኦናካ ቫኪ ማዴና። *

12 ካሴ ዋጋይ ኤቆንታ ዋዴ ናጋራ ኦሊዳ አሳይ ዉሪካ ዋጋይ ባይንዳ ጳያና፤ ዋጋይ ኤቁ ሰሚን ናጋራ ኦሊዳይቲ ዋጋን ኦይኬቲዲ ፐርዴታና። 13 አይሲ ጊኮ ያሳ አቻን ዓሎ ጌቲቲዛይቲ ኤቁዳ ዋጋስ አዛዘቲዛይታፕ ኦቲን ዋጋ ሲሲ ሲዩዛይታ ያላ ጊዴቲና። 14 ዋጋይ ባይንዳ አይዛቤቲ ዋጋይ ዮቲዛይሳ ጮ ማላ ሃኖቴላፊ ኤሪዲ ኦሊሺን ኢሰታስ ዋጋይ ባይንዳ አጊኮካ ኢሰታስ ማዴቴላ ዋጋይ ዲዛ ጊሽ ኢሰቲ ባ ኦላናይሳ ኤሬቲስ። 15 ኢሰታ ዋዝናይ ኢሰታስ ማርካቲዛ ጊሺኔ ኢሰታ ቆፋይ ኢሰታ ሞቲዛ ጊሽ ቃሴካ ኢሰታ ማዲዛ ጊሽ ዋጋይ ዮቲዛይ ኢሰታ ዋዝናን ያፌቲዳይሳ ኤሬቲስ። 16 ሄሲካ ታ ሚሺራቾ ቃላን ታማርሲዛ ማላ ያሲ አሳ ዋዝናን ቆቴቲዳይሳ ኪርሰቶሳ ባጋራ ፐርዲዛ ጋላሳን ቆንጫሳና።

አይሁዳታኔ ኢሰታ ዋጋ

17 ኔ ኔና አይሁዳ አሰ ጊኮ ዋጋን አማኔታሳኔ ኔስ ያሳራ ዲዛ ኢሲፊቴላን ጩቁታሳ። 18 ዋጋ ካሊዛ ጊሽ ያሳ ሼኔ ኤራዳ ኩማሕ ጊዲዛዝ ቫካ ኤሪዳ ጊዲኮ፡ 19 ኔ ቆቁታ ካሌሊዛዴ፤ ጳማን ዲዛይታስ ፖ ጊዲዳይሳ ኔ አማኔቲዳይ ጊዲኮ 20 ዋጋፕ ፤ ዴማዳ ኤራቴላኒኔ ቱማቴላን ሃንኮ ኤርንታይታ ዘሪዛዴ፡ ጉላ ናይታ ታማርሲዛይ ጊዲኮ 21 ሂሰቲኮ ኔኒ ሃራታ ታማርሶ አጋዳ ኔ ሁዔስ አዛሰ ታማሪኪ? ኔ ሃራ አሲ ካይሶቶፓ ጋ ሳባካሾ ኔስ ካይሶታይ? 22 ኔ ሃራ አሳይ ላይማቶንታ ማላ ዮታሼ ኔስ ላይማታይ? ኔስ ኤቃ ኢዳሳሺን ያሳ ከላ ሚሻ ቦንቃይ? 23 ኔስ ዋጋን ጩቁታሳ ሺን ዋጋ ኔ ባጋራ ኦሶንታ አጋዳ ያሳ ካዉሻይ? 24 ሄሲካ “ኢንቲ ጌዶን ያሳ ሱንላ አይዛቤታ አቻን ጫዬቲስ” ጌቲቲ ያፊቲዳ ማላ ሃኒዴስ። *

25 ኔ ዋጋ ናጋ ፖሊዛዴ ጊዲኮ ቃዓራስ ጎባይ ዴስ። ኔ ዋጋ ኦሶንታይ ጊዲኮ ቃሴ ኔ ቃዓራይ ጮ ሃዳ። 26 ቃዓራቶንታ ዲሼ ዋጋይ ጊዛይሳ ፖሊኮ ቃዓራቲዳዴራ ጊና ቆዴቴኔ? 27 ኔስ ያፊቲዳ ዋጋይኔ ቃዓራይ ኔስ ዲኮ ዲዛ ዋጋ ኔ ናጎንታይ ጊዲኮ ሃንኮ ቃዓራቶንታ ዲሼ ዋጋስ አዛዘቲዳይ ኔ ቦላ ፐርዳና።

28 ኢሳዴይ ጮ ማላ ሱንላስ አሳ አይፊን ታ አይሁዳ አሰ ጊዳና ጊኮ ኢዚ አይሁዳ አሲ ጊዴና። ቱማፕ ቃዓራቴላ ጮ

* 2:11 ዛሬ 10:17 * 2:24 ኢሳ 52:5

ካሬራ አሾ አይፊን ቤተዛ ቃፃራ ገደና። 29 ገዲኮካ ኢሲ አሲ አይሁዳ አሰ ገደናሰ ዳንዳዩዛይ ኢዛሰ ጋላ ባጋራ አይሁዳ አሰ ገዲሺና። ቃፃራይካ ቃፃራ ገዲዛይ ፃፊተዳ ዋጋ ፃላላ ገደንታ ኣያናን ዋዝናፔ ገዲዳ ቃፃራ ገዲኮኮ! ሄሳ ማላ አሲ ጋላታ ኣሳፔ ገደንታ ያሳፊ ዳሜሰ። *

3

1 ሂሰቲኮ አይሁዳ አሰ ገደላሰ ኣዛ ጎዓይ ዲዜ? ቃፃራይ ኣይ ጎዒዜ? 2 ኣዋራካ ገዲን ጎዓይ ዳሮ። ሃራፔ ኮይሮ ያሳ ቃላይ ሃዳራ አይሁዳታሰ ኢሜቲዳሰ። 3 ኢሰታፊ ኢሲ ኢሳዳሰ ኣማኖይ ባይንዳ ኣገኮ ያሳ ኣማኖቲል ዲጊዜ? 4 ሙሌካ ዲጊና! ኣሲ ወሪካ ዋርዳንቻ ቅ1 “ኒ ኔ ቃላፔ ዳንዲዳይሳን ቱማንቻ፤ ቅ2 ፐርዳንካ ያጊዛዳ ገዳሳ” ሄሳሉ ጌቲቲ ፃፊተዳ ማላ ያሲ ቃሴ ቱማንቻ። *

5 ኑ ማካላ ኦሶይ ያሳ ዲሎቲል ቆንጨን ቤሲዛይሳ ገዲኮ ሂሰቲን ኑ ኣይ ጋኔ? ጮ ኣሳ ዋጋ ማላ ፓላሜታናሰ ያሲ ባ ሃንቆ ኑ ቦላ ኤሂዛይሲ ኑሰ ቤሴና ጋኔዬ? ሄሳካ ታ ጊዛይ ኣሳሉ ቆፋና። 6 ቱማፔ ሄሳሉ ሃኔና። ሄሳሉ ሃጊዛ ገዲኮ ያሲ ኣላሜ ቦላ ዋሰቲ ፐርዳንዳ?

7 ታ ዋርዳቲል ያሳ ቱማቲል ቆንጨሲዛይሳን ኢዛ ቦንቾ ጌዴ ጉጂዛይሳ ገዲኮ ሂሰቲን ሃሲ ጋካናሰ ዋሰቲ ታ ቦላ ናጋራንቻ ማላ ፐርዳቲዜ? ገዲ ፓላሜታና ኣሲ ዳና ዳንዳዬሰ። 8 ሄሳ ጉሲ “ሎፆይ ያና ማላ ኣኔ ኢታ ኦሎሰ” ጌቲሰ ገዲ ኢሲ ኢሲ ኣሳቲ ኑ ቦላ ዋሪሲዛይሳ ማላ። ሃይታ ኣሳታ ቦላ ጋኪዛ ፐርዳይ ቱሙ ፐርዳ።

ኣሲ ወሪ ናጋራንቻ

9 ሂሰቲን ኑ ኣይ ገኖ? ኑኒ ኢሰታፊ ኣጳዘኒ? ሙሌካ ኣጳኮ። አይሁዳታ ገዲኮካ ኣይዛቤታ ገዲኮካ ወሪካ ናጋራፔ ጋርሳ ባጋራ ዲዛ ገሽ ታ ወርሳካ ካሴታዳ ኢሰታሰ ዮታዲሰ።

10 “ዲሎይ ኦኒካ ዳና፤ ኢሳዳይካ ዳና። 11 ዩሺ ቆፐዛዳይ ባዋ፤ ያሴ ኮዩዛይ ኢሳዳይካ ባዋ።

12 ወሪካ ባሌቲዳኔ
ኢሲ ቦላ ጎፆንታይታ ገዲዳ።
ሎፆ ኦሲዛይ ኦኒካ ባዋ፤
ኢሳዳይካ ዳና።

* 2:29 ዛሬ 30:6 * 3:4 ማዛ 51:4

- 13 ኢስታ ዲናይ ዶያ ዲዛ ዲሮ ማላ፤
 ኢስታ ዲናይ ኡባ ዋዴ ባሌሉ ሃሳዬስ፤
 ኢስታ ማቴርሻይ ሾሻ ማርዜራ ዴስ። *
- 14 ኢስታ ዲናን ቃንጌሊኔ ጫሞ ሚሽ ኩሚዴስ። *
- 15 ኢስታ ቶሆይ ሱሉ ጉሳናስ ኤሶቴስ።
- 16 ኢስታ ኦጌን ጳዮይኔ ላፋቴሉ ዴስ።
- 17 ኢስቲ ሳሮቴላ ኦጌ ኤሬቴና።
- 18 ኢስታ ኣይፌሶን ያሳስ ባቦይ ባሞ ጌቴቲ ፃፊቲዳ ማላ። *
- 19 ሃሳ ጊሽ ዲናይ ዉሪካ ጎርዳታና ማላ ዴሬይ ኩሜሉ ያሳስ ዛሮ ኢማና ማላ ዋጋይ ጊዛይ ዉሪካ ዋጋፔ ጊዶራ ዲዛይታስ ጊዲዳይሳ ኑ ኤሮስ። 20 ሃሳ ጊሽ ዋጋይ ናጋራይ ኣዛኮኔ ኤሪሴስ ኣቲን ዋጋ ናጎን ኦኒካ ኢዛ ኣቻን ፃሎ ጌቴታናስ ዲንዳዬና።

አማኖን ቤተዛ ሂሎቴሉ

- 21 ሃዒ ቃሴ ዋጋ ካሴ ናቤቲ ኢዛስ ማርካቲዳይሶ ዋጋፔ ካሬራ ጊዲዳ ያሳ ሂሎቴሉ ቆንጨዴስ። 22 ሃሲ ያሳ ሂሎቴሉ ዬሱስ ኪርስቶሳ አማኖን ዲማቴሉ ባይንዳ ቤተዛ ሂሎቴላ። *
- 23 ጋሶይካ ኣሲ ዉሪካ ናጋራ ኦሊዴስ። ያሳ ቦንቾይካ ኣሳ ናስ ፓጨዴስ። 24 ኣሳይ ዬሱስ ኪርስቶሲ ኣሳ ና ጊሽ ኦሊዳ ኪያቴላፊ ዴንዲዳይሳን ጮ ማላ ሂሊዴስ። 25 ኢዛ ሱላን ጊዲዳ አማኖን ናጋራፔ ማሬታና ያርሾ ሂስቲዲ ያሲ ዬሱሳ ሺሺዴስ። ኢዚ ሃሳ ኦሊዳይ ካሴቲዲ ፖሌቲዳ ናጋራ ቃዮኖንታ ዲንዳያን ኣጲዳ ባ ሂሎቴሉ ቤሳናሳ። 26 ኢዚ ሃሳ ሃ ዋዴዛን ኦሊዳይ ባ ሂሎቴላ ሃሲካ ባ ባጋራ ሂሎ ጊዲዳ ዬሱስ ኪርስቶሳን አማኒዛዴ ሂሊሲዛይሳ ቤሳናሳ።
- 27 ሂስቲን ኑኒ ኢዛን ጨቄቲዛ ሚሽ ኣዚ ዲዜ? ኣይኮ ሚሻንካ ጨቄቶኮ። ኑ ጨቄታና ጋሶይ ኣዜ? ዋጋ ናጊዛ ጊሼ? ጊዴና። አማኖና። 28 ኣይ ኣሲካ አማኖን ኣቲን ዋጋ ናጎን ኣቶንታይሳ ኑ ጌሺ ዮቶስ።
- 29 ያሲ ኣይሁዳታ ያሴ ፃላላ? ኣይዛቤታሰካ ያሴ ጊዴኔ? ኤ ኣይዛቤታሰካ ኢዚ ያሳ። 30 ቃፃሬቲዳይሳ አማኖን ቃሴ ቃፃሬቶንታይሳካ ሄ አማኖንካ ሂሊሲዛይካ ኢዚ ኢሲ ያሳ ፃላ። *
- 31 ሂስቲን ሃሲ ሃሳ ጊዲኮ አማኖ ጌዶን ዋጋ ጎዳይ ባይንዳ ሚሽ ኦሊኖ? ሙሌካ ሃሳሉ ሃኔና፤ ዋጋ ኑ ሚንላና ኣቲን።

* 3:13 ማዛ 5:9፤ 140:3 * 3:14 ማዛ 10:7 * 3:18 ማዛ 36:1
 * 3:22 ጋላ 2:16 * 3:30 ዛሬ 6:4፤ ጋላ 3:20

4

ኣብራሃሜይ ኣማኖን ዒሊዳስ

1 ሄሳ ጊሽ ቃሴ ኑ ኣብራሃሜይ ሃይሳፌ ኣይ ጎዓ ዳሚዳ ገኖ?
 2 ኣብራሃሜይ ባ ኦሶን ዒሊዳኮ ኢዚ ጩቁታናዚ ኢዛስ ዳሰኮ ሸን፤ ኢዚ ያሳ ሲንሳን ጩቁታናስ ዳንዳዬና። 3 ጌሻ ማፃፋይ “ኣብራሃሜይ ያሴ ኣማኒዳሲኔ ኢዛ ኣማኖይ ኢዛስ ዒሎቴላን ቆዳቲዳስ” ጌሰ። *

4 ኢሳዳይ ኦሶ ኦሊኮ ኢዚ ኤኪዛ ሚሻይ ኢዛስ ጮ ኪያቴላ ኢሜቲዛዝ ጊደንታ ኢዛዳስ ኦሶ ዋጋ ጊዳስ። 5 ጊደ ኣቲን ኦሶ ኦሶንታ ናጋራንቻ ኣሲ ዒሎ ኬሲዛ ያሳን ኣማኒዛዳስ ኢዛ ኣማኖይ ኢዛስ ዒሎቴላን ታይቤቴሰ። 6 ዳጩቲይካ ዒሎቴላ ኢዛዳስ ቆዳቲዛይ ሎዖ ኦሶን ጊደንታ ኣሳ ጊሽ።

7 “ኢስታስ ኢስታ ባላ ኦሶይ ኣቶ ጌቴቲዳይቲኔ ናጋራፔ ማሬቲዳይቲ ኣንጃቲዳይታ!

8 ኢዛ ናጋራ ጎዳይ ሙሌካ ቆደንታዳይ ኢዚ ኣንጃቲዳይሳ!” ጊዳስ።

9 ሃ ኣንጃዚ ቃፃሬቲዳይታስ ዓላላዬ? ዋይኮ ቃፃሬቶንታይታሳራ? “ካሴ ኮይሮ ኑ ኣዋ ኣብራሃሜ ኣማኖይ ኢዛስ ዒሎቴላን ቆዳቲዳስ” ጊደሰ።

10 ሂስቲን ዋኒ ኢዛስ ሄሳላ ቆዳቲዳ? ኢዚ ቃፃሬቲዳፔ ጉዬ? ዋይኮ ቃፃሬታናፔ ካሴ? ኢዛስ ዒሎቴላን ቆዳቲዳይ ኢዚ ቃፃሬታናፔ ሲንሳና። 11 ኢዚ ካሴ ቃፃሬታናፔ ካሴ ዳሚዳ ዒሎቴላይ ቃፃራስ ማላታ ጊዳና ማላ ዒሎቴላስ ማታሜ ኤኪዳስ። ሄሳ ጊሽ ቃፃሬቶንታ ኣማኒዛይታስ ዒሎቴላ ቆዳታና ማላ ኡባታስ ኢዚ ኣዋ። * 12 ኢዚ ቃፃሬቲዳይታስካ ኣዋ፤ ቃፃሬቲዳይታስ ዓላላ ጊደንታ ኑ ኣዋ ኣብራሃሜይ ካሴ ቃፃሬታናፔ ሲንጹ ኢዛስ ዲዛ ኣማኖ ጌዶ ካሊዛይታስ ኡባሳ።

ኣማኒዛ ኣሳስ ኢሜቲዳ ኡፋይስ

13 ኢዚ ኣላሜ ላቲዛዳ ጊዳና ማላ ኣብራሃሜይኔ ኢዛ ዜሬላቲ ኡፋይሳ ቃላ ኤኪዳይ ዋጋ ባጋራ ጊደንታ ኣማኖን ጊዳዳ ዒሎቴላና። * 14 ዋጋ ናገዛይቲ ላቲዛይታ ጊዳኮ ኣማኖስ ጎዳይ ዳና፤ ሂደታይካ ጮ ሃዳ ጊዳናሸን፤ 15 ዋጋይ ሃንቆ ካሌሌስ። ዋጋይ ባይንዳሶን ዋጋፔ ኣጴላ ዳና።

* 4:3 ሜዴ 15:6፤ ጋላ 3:6 * 4:11 ሜዴ 17:10 * 4:13 ሜዴ 17:4-6፤ 22:17-18፤ ጋላ 3:29

16 ሄሳ ጊሽ ሂደታይ አማኖን ዪዳስ። ሄሲካ ኢዛ ሂደታይ ኢዛ ከያቲላን ጊዳና ማላኔ አብራሃሜ ዜሬላሰ ኡባሰ አማኔቲዛይሳ ጊዳና ማላ ሃኒዳስ። ሄሲካ ዎጋን ኢዛይታ ጊዲዳይታሰ ፃላላ ጊደንታ አማኖን አብራሃሜ ናይታ ጊዲዳይታሰ ኡባታሳ። ኢዚካ ኩሰ ኡባሰካ አዎ። * 17 ሄሲካ “ታ ኔና ዳሮ ዳሬ አዎ ኦላዲሰ” ጌቲቲ ፃፊቲዳ ማላ ሃኒዳስ። ኢዚካ ሃይቁዳይታሰ ዳፆ ኢሚዛዳን ባይንዳይሳ ቃሴ ዲዛ ማላ ኦሊዛዳን አማኒዳ ያሳ ሲንላን ኢዚ ኩሰ አዎ። *

18 ካሴ ኢዛሰ “ኔ ዜሬሊ ሄሳላ ሃናና” ጌቲቲዳ ማላ አይኮ ሂደታይካ ባይንዳ ዲሺን አብራሃሜይ ያሲ ሃናና ጊዳይሳ አማኒዲ ዳሮ ዳሬ አዎ ጊዲዳስ። * 19 አብራሃሜሰ ዩሌቲን ፃቱ ላይሳ ጊዲቹን አብራሃሜይ ባ አሳቲላይ ሃይቁላ ማላ ጊዲዳይሳኔ ሳራሰ ዩሎ ዎዳይ አቋ ቢዳይሳ ኤሪሽካ አማኖን ለፒቤና። *

20 ጌዴ ጉጂዲ አማኖን ሚኒዲ ያሳሰ ቦንቾ ኢሚዳሰ አቲን ያሲ ጊዳ ቃላ ሲቋቤና። 21 ያሲ ኢዛሰ ኢሚዳ ሂደታይ ፖሌታናይሳ ኩሜላ ዎዘናፔ አማኒዳስ። 22 ሄሳ ጊሽ ኢዛሰ ዪሎቲላን ቆዳቲዳስ። 23 “ኢዛሰ ዪሎቲላን ቆዳቲዳስ” ጊዛ ቃላይ ፃፊቲዳይ ኢዛሰ ፃላላ ጊዳና። 24 ጊደ አቲን ያሲ ኩ ዪሎቲላ ኢዛ ባጋራ ታዩቢዛ ኩ ጎዳ ዩሱሳ ሃይቆፔ ዳንሊዳይሳን አማኒዛ ኩሳራ። 25 ኢዚ ኩ ናጋራ ጊሽ ሃይቃናሰ አቋ ኢሜቲዳስ። ኢዚ ኩና ዪሊሳናሰ ሃይቆፔ ዳንዲዳስ። *

5

ሳርቲሊኔ ኡፋይሰ

1 ሂሰቲኮ ኩኒ አማኖን ዪሊዳ ጊሽ ኩ ጎዳ ዩሱሰ ኪርሰቶሳ ባጋራ ኩሰ ያሳራ ሳርቲሊ ዳስ። 2 ሃይሳ ሃ አማኖዛን ሚኒ ዲዛ ከያቲላን ኩኒ ጌሊዳይ ኢዛ ባጋራ ጊዲዳ ጊሽ ኡፋይሳን ያሳ ቦንቾ ጊሽቲ ኤኪዛይታ ጊዲዳ ጊሽ ኩ ኡፋሶስ።

3 ሃይሳን ፃላላ ጊደንታ ኩና ጋኪዛ ዎዩንካ ኡፋይቶሰ። ጋሶይካ ዎዩይ ዳንዳያን ጋሊዛይሳ ኩ ኤርሰ። 4 ዳንዳያይ ፓጩን ሚኖቲላ ኢሜሰ፤ ፓጩን ሚኖቲላ ሂደታ ኢሜሰ። 5 ሄ ሂደታይ ቃሴ ኩና ዩላቹና። ያሲ ኩሰ ኢሚዳ ዪሎ አያናን ባ ሲቆ ኩ ዎዘናን ጉሲዳ ጊሽ ሄ ሂደታይ ኩና ዩላን ጋሌና።

* 4:16 ጋላ 3:7 * 4:17 ሜዴ 17:5 * 4:18 ሜዴ 15:5 * 4:19 ሜዴ 17:17 * 4:25 ኢሳ 53:4-5

6 ኑ ደቡራንቻታ ጊዲ ዲሺን ያሳ ወዳይ ጋኪዳ ማላ ከርሰቶሲ ኑ ናጋራ ገሽ ሃይቂዳስ። 7 ዲሎ አሳ ገሽ ሃይቃና አሲ ቤታናይሲ ዳሮ ማቴስ። ሎዎ አሳ ገሽ ሃይቃናሰ ፃላና አሲ ኦኔ ኤሪዛይ ቤታና ዳንዳዬስ። 8 ገደ ኣቲን ኑ ቡሮ ናጋራንቻ ጊዲ ዲሺን ከርሰቶሲ ኑ ገሽ ሃይቂዳስ። ሄሲካ ያሲ ኑና ሰቂዛ ባ ሲቆ ሄሳን ቤሴስ።

9 ኦኒ ኢዛ ሱላን ጌዱዳይታ ጊዲኮ ሃራፕካ ኢዛ ባጋራ ያሳ ሃንቆፊ አታና። 10 ኑ ያሳሰ ሞርኬታ ጊዲ ዲሺን ኢዛ ናዛ ሃይቆን ኢዛራ ገረዳይታ ጊዲኮ ኑ ኢዛራ ገረዳፔ ጉዬ ኢዛ ናዛ ዴዎ ባጋራ ኦኒ ፓዲዳይሲ ዋኒ ከሂ ዳሬኔ! 11 ሄሳ ፃላላ ገዴና፤ ቃሴካ ኦኒ ሃዲ ኢዛራ ገጋ ዴሚዳ ኑ ጎዳ ዬሱሰ ከርሰቶሳ ባጋራ ያሳንካ ኡፋይሰ ኦሶስ።

ሃይቆይ ኣዳሚ ባጋራ፣ ዴዎይ ከርሰቶሳ ባጋራ ዬዳስ

12 ሄሳ ገሽ ናጋራይ ኢሳዴ ጋሶን ዲጌ ሃ ኣላሚዛ ዬዳ ማላ ሃይቆይካ ናጋራ ጋሶን ዬዳስ። ሃይቆይካ ሄሳ ባጋራ አሳ ኡባኮ ዬዳስ። ሄሳሰ ጋሶይ አሲ ዉሪካ ኢዛ ባጋራ ናጋራ ኦላዳ ገሻሳ።

* 13 ዎጋይ ኢሚታናፔ ካሴ ናጋራይ ቢታ ቦላ ዴስ ሺን ዎጋይ ባይንዳሶን ናጋራይ ናጋራ ገዴና። 14 ገደ ኣቲን ኣዳሚፔ ሃ ሲሚን ሙሴ ዎዴ ጋካናሰ ዲዛ ዎዴን ኣዳሚ ማላ ዎጋ ሚንሉዲ ናጋራ ኦሶንታይታ ቦላካ ሃይቆይ ካዎቲዳስ። ኣዳሚይ ቡሮ ያና ከርሰቶሳሰ ለሚሶ።

15 ገዲኮካ ኢዛ ኪያቴላ ኢሞታይ አሳ ቆሆ ማላ ገዴና። ኢሳዴይ ሞሪዳይሳን ዳሮ አሳይ ሃይቂኮካ ያሳ ኪያቴላኔ ኢሲ አሲ ዬሱሰ ከርሰቶሳ ኪያቴላን ዬዳ ኢሞታይ ዳርታሰ ከሂ ዳሪ ኢሚቲዳስ። 16-17 ቃሴካ ያሳ ኢሞታይ ኢሳዴ ባጋራ ዬዳ ናጋራፔ ቤቲዳ ኣይፊ ማላ ገዴና። ጋሶይካ ኢዛ ፐርዳይ ኢሳዴ ናጋራ ካሊዲ ፐርዳ ኤኪ ዬዳስ። ኢዛ ኢሞታይ ቃሴ ዳሮ ቆሆ ጋሶን ዲሎቴላ ኤሂዳስ። ሃይቆይ ኢሳዴ ባጋራ ካዎቲዳይሳ ገዲኮ ዳር ቲርፓ ገዲዳ ያሳ ኪያቴላኔ ዲሎቴላ ኢሞታ ኤኪዳይቲ ኢሳዴ ባጋራ ሄሲካ ዬሱሰ ከርሰቶሳ ባጋራ ያንዲ ዴዎን ዳና።

18 ሂሰቲኮ ኢሳዴ ቆሆ ጌዶን ፐርዳይ አሳ ኡባ ቦላ ጋኪዳ ማላ ሄሳሶካ ኢሳዴ ዲሎቴላ ኦሶን ኣሰ ኡባሰ ዴዎ ኢሚዛ ዲሎቴላ ቤቲዳስ። 19 ኢሳዴይ ኣዛዜቶንታ ኢዲዳ ገሽ ዳሮ አሳይ ናጋራንቻ ገዲዳ ማላ ኢሳዴ ኣዛዜቶን ቃሴ ዳሮቲ ዲላና።

20 ዎጋይ ዬን ሞሮይ ዳሪዳስ። ገደ ኣቲን ናጋራይ ዳርይሳፊ ቦላራ ያሳ ኪያቴላ ከሂ ዳሪዳስ። 21 ሄሲካ ሃኒዳይ ናጋራይ

* 5:12 ሜዴ 3:6

ሃይቆ ቦላ ካዎተዳይሳ ማላ ዩሱስ ኪርስቶስ ባጋራ ቃሴ ሜርና ደያይ ቤታና ማላ ኢዛ ኪያቴሌ ዲሎቴላን ካዎታናሳ።

6

ናጋራፔ ሻኬቲዲ ኪርስቶስን ዲስ

1 ሂስቲን ኑ ኣይ ጊኖ? ያሳ ኪያቴሌ ዳራና ማላ ናጋራ ጉጂ ኦሊኖ? 2 ሙሌካ ጊዳና። ኑኒ ናጋራስ ሃይቂደስ። ሂስቲን ሃይሳፌ ጉዬ ኑ ዋኒ ናጋራን ዳኔ? 3 ኑኒ ዩሱስ ኪርስቶሳራ ኢሲኖ ጊዳና ማላ ፃማቁቲዳይቲ ኢዛ ሃይቆን ኑ ኢሲፌ ጊዳናስ ፃማቁቲዳይሳ ሃይሳ ኢንቴ ኤሬኬቲ? 4 ሄሳ ጊሽ ኪርስቶሲ ባ ኣዎ ቦንቸን ሃይቆፔ ዳንዲዳ ማላ ኑኒካ ሄሳሉ ኦራሳ ዳዖን ዳናስ ዊንቃቴን ሃይቂዲ ኢዛራ ሞጊቲደስ። *

5 ኑኒ ሄሳ ማላ ሃይቆን ኢዛራ ኢሲኖ ጊዲኮ ቃሴ ዳንላንካ ኢዛራ ኢሲኖ ጊደስ። 6 ሃይሳፌ ጉዬ ኑ ናጋራስ ኣይሌ ጊደንታ ማላ ናጋራ ኣሳቴላይ ኪቻና ማላ ካሴ ኑ ጨጋ ኣሳቴላይ ኢዛራ ኢሲፌ ካቁቲዳይሳ ኑ ኤርስ። 7 ጋሶይካ ሃይቂዳ ኣሲ ናጋራፔ ሸምፕደስ።

8 ኑኒ ኪርስቶሳራ ሃይቂዳይታ ጊዲኮ ኑ ኢዛራ ኢሲፌ ዳናይሳ ኣማናስ። 9 ኪርስቶሲ ሃይቆፔ ዳንዲዳ ጊሽ ናምዓንሉ ኢዚ ሃይቆንታይሳኔ ኢዛ ቦላ ሃይቆስ ዎልቃይ ባይንዳይሳ ኑ ኤርስ። 10 ኢዚ ሃይቂዳ ዎዴ ኢሲቶ ዉርሲ ናጋራ ጊሽ ሃይቂዳስ። ጊደ ኣቲን ያሳስ ፓፃ ዲስ ዴስ። 11 ሄሳሉካ ኢንቴ ናጋራስ ሃይቂዲ ያሳስ ዩሱስ ኪርስቶስ ባጋራ ፓፃ ዲዛይሳ ኤሬቴ።

12 ሄሳ ጊሽ ኢታ ኦላና ኮዪዛ ኢታ ኣሾ ቆፋ ኮይዲ ሃይቂዳ ኢንቴ ኣሳቴላ ቦላ ናጋራይ ካዎታና ማላ ኦላፍቴ። 13 ኢንቴ ኣሳቴላ ኢታ ኦሶ ኦሊዛ ሚሽ ኦሊ ናጋራስ ሃሪሶፍቴ። ሄሳ ማላ ኦላናፔ ሃይቆፔ ጌዴ ዳዖን ፒኒዳ ኣሳታ ማላ ኢንቴና ያሳስ ሃሪሲቴ። ኢንቴ ኣሳቴላ ዲሎቴላ ሚሻ ማላ ያሳስ ሃሪሲቴ። 14 ኢንቴ ያሳ ኪያቴላ ጋርሳን ዴታ ኣቲን ዎጋ ጋርሳን ደንታ ጊሽ ኢንቴና ናጋራይ ሃሪና።

ዲሎቴላ ኣሳንቻታ

15 ሂስቲን ኣይ ኦሊኖ? ዎጋ ጋርሳን ጊደንታ ኑኒ ያሳ ኪያቴላ ጋርሳን ዲዛ ጊሽ ናጋራ ኦሊኖ? ሙሌ ኦላናስ ቤሴና። 16 ኢንቴ ኢንቴና ኣይሌ ማላ ሺሺዛ ዎዴ ኢንቴ ኣዛዜቴዛዴስ ኣይሌ ጊዲዳይሳ ኤሬታ። ሄሳሉካ ጌዴ ሃይቆኮ ኤሬዛ ናጋራስ ዎይኮ ዲሎቴላኮ ጋሊዛ ኣዛዜቴላስ ኢንቴ ኣይሌ ጊዲዳይሳ

* 6:4 ቆላ 2:12

ኤሬኬቲ? 17 እንቲ ካሴ ናጋራሰ አይሌታ ጊዲኮ እንቲሰ እሚቲዳ ቲሚርቲዛሰ እንቲ ዎዝናፔ አዛዜቲዳ ጊሽ ያሲ ጋላቲቶ። 18 እንቲ ናጋራፔ ዎዜቲዲ ዲሎቴላሰ አይሌ ጊዲዴታ።

19 ሃይሳ ታ አሳ ቃላን እንቲሰ ቆንጨን የቲዛይ እንቲ ዩሌቴላን ዳቡራንቻ ጊዲዳ ጊሻሳ። እንቲ ካሴ ዎዴ እንቲ አሳቴላ አይሌቴላሲኔ ካሴፔ አዲ ኢታና ማላ ኦሊ ኢሜታ ሺን ሃሲ ቃሴ ጌዴ ጌሻቴላኮ ኤፊዛ ዲሎቴላሰ አይሌ ሂሰቲ ሃሪሰቴ።

20 እንቲ ካሴ ናጋራሰ አይሌቲዲ ዲዛ ዎዴ እንቲ ዲሎቴላፊ ማላ አቲዴታ ሺን፤ 21 ሃሲ ቃሴ እንቲ ዩላቲዛ ሚሻታፔ ሄ ዎዴ አይ ጎዳ ዴሚዴቲ? ሄሳ ሄ ሃናዛ ጎዳይ ሃይቆ። 22 ሃሲ ቃሴ እንቲ ናጋራፔ ዎዜቲዲ ያሳ አይሌታ ጊዲዴታ። ሄሲካ እንቲና ጌዴ ጌሻቴላኮ ካሌሌሰ። ወርሴላይካ ሚርና ዴዎ። 23 ናጋራ ዎጋይ ሃይቆ፤ ጊዶ አቲን ያሳ ኢሞታይ ጊዲኮ ጎዳ ዩሱሰ ኪርሰቶሳ ባጋራ ሚርና ዴዎ።

7

ኤኮኔ ጌሎ ለሚሶ

1 ታ አሻቶ! ታኒ ዎጋ ኤሪዛ አሳታሰ የታይሰ። ዎጋይ ሸሞፖራ ፓፃ ዲዛ አሳ ፃላላ ሃሪዛይሳ እንቲ ኤሬኬቲ? 2 ኢሲ ማጫሲ አዚና ጌሊኮ ባ አዚናራ ኢዛ ዎጋን ቃሽቲዛይ አዚናይ ፓፃ ዲዛ ዎዴ ጋካናሳ። አዚናይ ሃይቁኮ ኢዛ ማቾ ጊዲዛ ዎጋፔ አንጃታወሰ። 3 ጊዶ አቲን አዚናይ ፓፃ ዲሺን ኢዛ ሃራ አዚና ጌሊኮ ላይማ ጌቲታወሰ። አዚናይ ሃይቁኮ ቃሴ ሃራ ኣሲ ጌሊኮ ካሴ አዚና ዎጋፔ አንጃታዲሰ አቲን “ላይማ” ጌቲቲኩ።

4 ሄሳ ጊሽ ታ አሻቶ! እንቲካ ዩሱሰ ኪርሰቶሳ አሳቴላ ባጋራ ዎጋሰ ሃይቁዴታ። እንቲ ሃይቆፔ ዴንዲዳ ኪርሰቶሳ ባጋ ጊዲን ኑኒ ያሳሰ አይፊ አይፋናሳ። 5 ናጋራንቻ ሜዴቴላ ሽኔን ኑ ዲዛ ዎዴ ሃይቆሰ ጋላዛ አይፊ ኑ አይፋና ማላ ዎጋይ ዴንሌዲዳ ናጋራ አሞይ ኑ ቦላ ኦሊዴሰ። 6 ሃሲ ጊዲኮ ካሴ ኑና ዎዲ ቃቺዳ ዎጋሰ ሃይቁዳ ጊሽ ሄ ዎጋፔ ዎዜቲዳሰ። ሄሲካ ካሴ ጩጋ ዎጋን ያፊቲዳይሳን ጊዶንታ ዲሺ ኑራላ አያና ኦጌን ኑኒ አላናሳ።

ናጋራራ ባፄቴላ

7 ሂሰቲን ኑ አይ ጊኖ? ባ ሁዔሰ ዎጋይ ናጋራ? ሙሊካ ጊዴና። ዎጋ ባጋራ ጊዶንታኮ ናጋራይ አዛኮኔ ኑ ኤርኮኮ ሺን፤ ዎጋይ “አሞቶፋ!” ጎንታኮ አሞይ አዛኮኔ ቲማፔ ታ ኤሪኬ።

* 8 ናጋራይ ቃሴ ዋጋፔ ኬዚዳ አዛዘይ ቤሲዳ ኦጌን ጎዔቲዲ ታ ጊደን ዲማ ዲማ ኢታ አሞ ዳንጩሲዳ። ዋጋይ ያናፔ ካሴ ናጋራይ ሃይቂዳዛ።

9 ዋጋይ ባይንዳ ካሴ ታኒ ፓፃ ዳይሲሽን ዋጋይ ዩን ቃሴ ናጋራይ ፓፃ ጊዲዳ። ታ ጊዲኮ ሃይቃዲሲ። 10 አሰ አሻና ቆፊቲዳ አዛዘይካ ሃይቆ ኤኪ ዩዲሳ ኤራዲሲ። 11 ናጋራይ ዋጋ ባጋራ ቤቲዳ ጋሶን ጎዔቲዲ ታና ባሌሊዳሲኔ አዛዘን ዋጂዳ። *

12 ሄሳ ገሽ ዋጋይ ባ ባጋራ ጌሻ። አዛዘይካ ጌሻ፤ ዲሎኔ ሎዎ። 13 ጊደ አቲን ሎዎስ ሃኒዳይሲ ታሰ ሃይቆስ ጊዲዳ? ሙሌካ ጊደና። ጊደ አቲን ናጋራይ ባ ናጋራቲላን ኤሬታና ማላ ሎዎ ጊዲዳ ሃና ባጋራ ታ ቦላ ሃይቆ ኤሂዳ። ሄሲካ ናጋራይ አዛዘ ባጋራ ካሴፔ አሊ ናጋራ ዳርሲዳ።

14 ዋጋይ አያና ዮዎ ጊዲዳይሳ ኑ ኤርሰ። ታ ቃሴ ናጋራሰ አይሌ ማላ ባይዘቲዳ አሳ። 15 ታኒ ታ ኦሊዛይሳ ኤሪኬ። ታ ኦላና ኮዩዛይሳ ኦላ ኤሪኬ ሽን ታ ኢዲዛ ሚሽ ኦላይሰ። * 16 ታ ኦላና ኮዮንታ ሚሽ ኦሊዛ ጊዲኮ ዋጋይ ሎዎ ጊዲዳይሳ ታ ማርካታይሰ። 17 ሄሳ ኦሊዛይ ታና ጊደንታ ታ ጋላን ዲዛ ናጋራይ ኦሌሰ።

18 ታናን ሄሲካ ናጋራንቻ ጊዲዳ ታ ሜዴቲላ ጊደን አይኮ ሎዎ ሚሽ ባይንዳይሳ ታ ኤራይሰ። ሎዎ ኦላናሰ ታሰ አሞቲላ ዳሰ ሽን ፖላ ኦላ ኤሪኬ። 19 ታ ኦሊዛይ ኦላና ጋዳ ኮዩዛ ሎዎ ኦሶ ጊደና። ጊደ አቲን ታ ኦላና ኮዮንታ ኢታ ኦሶ ኦላይሰ። 20 ታኒ ኦላናሰ ኮዮንታይሳ ኦሊዛ ጊዲኮ ሄሳ ኦሊዛይ ታና ጊደንታ ታ ጊደን ዲዛ ናጋራ።

21 ሄሳ ገሽ ሃይሲ ዋጋይ ኦሶን ዲዛይሲ ታሰ ጌሊዳ። ሄሲካ ታኒ ሎዎ ኦላና ኮዮይሲሽን ኢታ ኦላይሰ። 22 ታኒ ታ ጋላራ ያሳ ዋጋን ኡፋይታይሰ። 23 ጊደ አቲን ታ አሳቲላ ጊደን ኦሊዛ ናጋራ ዋጋይ ታና ቃቺ ኦይኪዲ ታ ቆፋ ዋጋራ ኦሊቲዛ ሃራ ዋጋይ ታ አሳቲላ ጊደን ኦሊሽን ቤያይሰ። 24 ታ አይ ማላ ላፋ አሴ! ሃይሳ ሃይቆስ ኢሜቲዳ አሳቲላፊ ታና አሻናይ ኦኔ? 25 ኑ ጎዳ ዩሱስ ከርሰቶሳ ባጋራ ጋላታይ ያሳሰ ጊደ።

ሂሰቲኮ ታኒ ታ ባጋራ ታ ቆፋን ያሳ ዋጋሰ አይሌ ጊዳሼ ታኒ ታ ሜዴቲላ ዋጋን ናጋራ ዋጋሰ አይሌ።

* 7:7 ኬሳ 20:17፤ ዛሬ 5:21 * 7:11 ሜዴ 3:13 * 7:15 ጋላ 5:17

8

ዲሎ አያናን ዲሳ ጊሽኔ አሾን ዲሳ ጊሽ

1 ሄሳ ጊሽ ዬሱስ ከርስቶሳ አማኒዛይታ ቦላ ፐርዲይ ዴና።
2 ጋሶይካ ዴዎ አያና ዋጋይ ዬሱስ ከርስቶሳ ባጋራ ናጋራፔ ኢስታ ጌሺዳ ጊሻሳ። 3 ናጋራንቻ አሾፕ ዴንዲዳይሳን ዋጋይ ፖላናስ ዳንዳዮንታይሳ ያሲ ባ ናዛ ናጋራንቻ ኣሳ ለሚሶን ናጋራስ ያርሼታና ማላ ዬዲዲ ፖሊዴስ። ሂስቲዲ ናጋራ ኢዛ አሾን ፐርዲዴስ። 4 ሄሲካ ኑኒ አሾን ጊደንታ አያናን ሲሜሬቲዛ ኑፕ ዋጋይ ኮዪዛ ዲሎቴላ ፖላናሳ።

5 አሾ ሽኔ ማላ ዳና ኮዪዛ ኣሳታ ዋዝናይ አሾይ ኮዪዛ ሚሻን ሽምፕሰ። አያና ሽኔ ማላ ዲዛይቲ ቃሴ ባ ዋዝና አያናይ ኮዪዛ ሚሻ ቦላ ዋፌቲስ። 6 አሾስ ፃላላ ቆፋይ ሃይቆ ጊዲሺን አያና ዮዮስ ቆፋይ ጊዲኮ ዴዎኔ ሳርቴላ። 7 ናጋራስ ሃሬቲዛ ዋዝናይ ያሳራ ኦሻ። ጋሶይካ ኢዚ ያሳ ዋጋስ ሃሬቲናኔ ሃሬታናስ ዳንዳዮና። 8 አሾ ሽኔ ማላ ዲዛ ኣሳቲካ ያሴ ኡፋይሳስ ዳንዳዮቴና።

9 ኢንቴ ቃሴ ያሳ አያናይ ኢንቴናን ዲዛ ጊዲኮ አሾን ጊደንታ አያናን ዴታ። ከርስቶሳ አያናይ ኢዛ ቦላ ባይንዳዴይ ከርስቶሳስ ጊዴና። 10 ከርስቶሲ ኢንቴ ጊደን ዲኮ ቃሴ ኢንቴ ኣሳቴሳይ ናጋራ ጌደን ሃይቆስ ጊዲኮካ ኢንቴ አያናይ ቃሴ ዲሎቴላ ጋሶን ዴዎን ዴስ። 11 ዬሱሳ ሃይቆፔ ዴንፊዳ ኢዛ አያናይ ኢንቴ ቦላ ዲዛ ጊዲኮ ከርስቶሳ ሃይቆፔ ዴንፊዴይሲ ኢንቴ ጊደን ዲዛ ኢዛ አያናይ ሃይቃናስ ዲዛ ኢንቴ ኣሳቴሳስ ዴዎ ኢማና። *

12 ሄሳ ጊሽ ታ አሻቶ! ሄሲካ ሃናናይ ደሳን ጊዴና ሽን ኑ አሾ ሽኔ ማላ ዳናስ አሾስ ጊደኮ። 13 አሾ ሽኔ ማላ ዲዛ ጊዲኮ ኢንቴ ሃይቃና፤ አሾ ኦሶ ኢታዛ ኢንቴ አያናን ዋጂኮ ኢንቴ ዴዎን ዳና። 14 ያሳ አያናን ካሊዛይቲ ኢስቲ ያሳ ናይታ። 15 ኢንቴ ኤኪዳ አያናይ ዛሪዲ ኢንቴና ኣይሌቴላን ሃሪዛ አያና ጊደንታ “ኑ ኣዋዉ” ጊ ዪይጊሲዛ ናቴላ አያና ኤኪዴታ። * 16 ኑኒ ያሳ ናይታ ጊዲዳይሳ፤ ሄ አያናይ ባ ባጋራ ኑ አያናራ ኢሲፌ ኑስ ማርካቴስ። 17 ኑኒ ያሳ ናይታ ጊዲኮ ኢዛ ላቲዛይታ። ኑ ከርስቶሳ ቦንቸዛ ላቲዛይታ ጊዳና ማላ ኣዳፊካ ኢዛራ ኢዛ ሜቶዛ ጊሹቲዛይታ ጊዲኮ ኑ ያሴ ላቲዛይታ፤ ከርስቶሳራካ ኢሲፌ ላቲዛይታ።

ቡር ያና ቦንቸ

* 8:11 1ቆር 3:16 * 8:15 ማር 14:36፤ ጋላ 4:6

18 ሃዲ ኑ ኤኪዛ ዋዬይ ቡሮ ኑስ ሲንላን ገጊ ኡቲዳ ቦንቾዛራ ጋሌ ጃሊሽን ኣይኮካ ገዳና ጋይሰ። 19 ሜዴቴላይ ወሪካ ያሳ ናይቲ ቆንጫናይሳ ላሞቴላን ናጎን ዳስ። 20 ሜዴቴላ ወሪካ ሜላ ሃዳ ገዳና ማላ ፐርዴቲዳስ። ሄሲካ ባ ዶሮን ገደንታ ሲንሳፊስ ሃሪታና ማላ ኢዚ ባ ሹኔ ማላ ሃሪሲዳ ገሻሳ። *

21 ሄሲካ ሜዴቴላ ወሪካ ዳይሳ ኣይሌቴላፊ ዋዜቲዳ ያሳ ናይታሰ ገዲዳ ጌዴ ቦንቾቲዳ ሹኔ ማላ ዲዛሶ ጋካናሳ። 22 ሃዲ ጋካናሰ ሜዴቴላ ወሪካ ዳሮ ዋዬን ሚፃቲሹ ዲዛይሳ ኑ ኤሮስ። 23 ኢዛ ፃላላ ገደንታ ኮይሮ ዓሎ ኣያና ኢሞታ ዴሚዳ ኑኪካ ኑ ኣሳቴላይ ኣታና፤ ኑ ኢዛ ና ገዳናይሳካ ላሞቴሹኔ ዋዝናራ ሚፃቲሹ ደስ። *

24 ሃይሳ ሃ ሂደታን ፃላላ ኣቲደስ። ሂደታይ ቃሴ ኣይፊን ቤቲዛ ሚሽ ገዲኮ ቡሮፔ ናገዛ ሚሽ ገዳና፤ ሃዲ ባ ኣይፊን ቤዪዛ ሚሽ ቡሮፔሰ ናገዛይ ኦኔ? 25 ገደ ኣቲን ኑኒ ቡሮ ኑ ኣይፊን ቤዮንታ ሚሽ ሂደታን ናገዛዝ ገዲኮ ሳሌታይ ባይንዳ ናጎስ።

26 ሃሳሶካ ቃሴ ኑ ዳቡሪሽን ኣያናይ ኑና ማዳስ። ኑኒ ዋሳ ዋሰቲ ዋሳናኮኔ ኤሮንታ ገሽ ኣያናይ ኑኒ ቃላን ቆንጫሳናሰ ዳንዳዬቶንታ ቃላራ ኑስ ዋሴስ። 27 ኑ ዋዝና ፓጪ ኤሪዛ ኣያናይ ኢዚ ኣያና ቆፋ ኤሬስ። ጋሶይካ ኣያናይ ያሳ ሹኔ ማላ ኣሚኒዛ ኣሳሰ ኑስ ዋሴስ።

28 ያሲ ባና ደሲዛይታሲኔ ኢዛ ሹኔ ማላ ጃይጌቲዳይታሰ ኡባሰ ኦሊዛ ሚሽ ወርሲካ ሎዖስ ኦሊዛይሳ ኑ ኤሮስ። 29 ያሲ ካሴፔ ባ ኤሪዛይታ ኢሰቲ ኢዛ ናዛ ሚሳታና ማላ ካሴካ ዶሪ ዋሊዳስ። ሄሲካ ዳሮ ባ ኢሻታ ገደፊ ኢዚ ባይራ ገዳናሳ። 30 ካሴ ኮይሮፔ ባ ዶሪዳይታ ኢሰታ ጃይገዳስ። ቃሴካ ጃይገዳይታ ዒሊሲዳስ። ባ ዒሊሲዳይታካ ቦንቾዳስ።

ያሳ ሲቆ

31 ሂሰቲን ሃሳ ኑ ኣይ ገና? ያሲ ኑናራ ገዲኮ ኑናራ ኤቄታናሰ ዳንዳዪዛይ ኦኔ? 32 ባ ናዛሰ ሚሹቶንታ ኑ ገሽ ኣሊ ኢሚዳይ ኢዛ። ሂሰቲን ኡባ ሚሽ ኑስ ኢዛራ ኪያቴላን ወርሲ ኣዛሰ ኢሜኔ? 33 ያሲ ዶሪዳይታ ሞቲዛይ ኦኔ? ዒሊሲዛይ ያሳ። 34 ሂሰቲን ፐርዲዛይ ኦኔ? ሃይቁዲ ሃይቆፔ ዴንዲዲ ያሳ ኡሻቻን ኡቲዳ ዬሱሰ ኪርሰቶሲ ኑ ገሽ ጋናቲስ።

35 ኑና ኪርሰቶሳ ሲቆፔ ሻካናይ ኦኔ? ሜቶዬ? ዋዬ? ዋይኮ ጎዴቴሌ? ዋይኮ ጋፋ? ዋይኮ ካሎቴሌ? ዋይኮ ቆፖንታ ጋኪዛ

* 8:20 ሜዴ 3:17-19 * 8:23 2ቆሮ 5:2-4

ሚቶይ? ማሻ? 36 ሄሲካ ካሴ “ኔ ጊሽ ኑ ሹኩቲዛ ደርሳ ማላ ቆዴቲደሰ። ጋላሰ ኩሜሰ ኔ ጊሽ ኑኒ ሃይቆራ ባጭታና” ጌቲቲ ፃፊቲዳይሳ ማላ። 37 ኑና ኣዚካ ኢዛፔ ሻኬና። ሃይሳ ኡባን ኑና ሲቋዳይሳን ፃኒዛይታፔካ ኑ ኣጵሰ።

38 ሃሳ ጊሽ ሃይቆ ጊዲን፣ ዴፆ ጊዲን፣ ኪታንቻታ ጊዲን፣ ዋይኮ ሃዒ ዲዛ ሚሽ ጊዲን፣ ቡሮ ያና ሚሽ ጊዲን፣ ዋይኮ ኣይ ዋልቃማ ጊዲን፣ 39 ጶቃ ጊዲን ዋይኮ ዚቃ ጊዲን፣ ዋይኮ ኣይ ሜጴቴሰ ጊዲን ጎዳ ዬሱሰ ከርሰቶሳ ባጋራ ኑሰ ዲዛ ያሳ ሲቆፔ ኑና ሻካና ዳንዳዪዛ ሚሺ ባይንዳይሳ ታ ሻካ ኤራዲሰ።

9

ያሳ ደር

1 ታ ዬሱሳ ሱንገላን ቱሙ ጋይሰ፤ ዋርደቲኬ፤ ታ ዋዝናይካ ጂሎ ኣያና ባጋራ ታሰ ማርካቲሰ። 2 ታሰ ዋዝናፔ ኪቾንታ ጌታ ቆፋይኔ ሚሻይ ደሰ። 3 ታ ዳቦታ ጊሽ ታ ቃንጌታዳኔ ከርሰቶሳፔ ሻኬታዳ ዋራ ዋጲዳኮ ደሳይሰ። 4 ኢሰቲካ ኢሰራዔሌ ናይታ፤ ኢሰቲ ያሳ ና ጊዳና ማላ ያሳ ቦንቾይኔ ጫቆ ቃላይ፣ ዋጋይኔ ያሳ ኬላ ዋጋ ሂደታይ ኢሰታሰ ኣሚቲደሰ። * 5 ካሴ ኣዋቲካ ኢሰታ ባጋ ከርሰቶሲ ኢሰታ ዜሬላ ዛርኬን ቆዴቲሰ። ኢዚካ ኡባሬ ቦላ ጊዲዳ ሜርናሰ ጋላቲቲዳ ያሳ። ኣሚን።

6 ጊደ ኣቲን ሃሳ ጉሲ ያሳ ቃላይ ኣቲደሰ ጉሲ ጊደና። ኢሰራዔሌፔ ዬሌቲዳይ ዉሪ ኢሰራዔሌ ኣሰ ጊደና።

7 ኣብራሃሜፔ ዬሌቲዳይቲ ኢዛፔ ዬሌቲዳ ጊሽ ዉሪካ ኢዛ ናይታ ጊደቲናሺን “ኔ ዜሬላ ዩሳቃ ባጋራ ጃይጌታና” ጌቲቲዳ ማላ ሃኒደሰ። * 8 ሃሳ ጉሲካ ያሳ ና ጌቲቲዳይቲ ኢሰቲ ኣሾን ዬሊዳይታ ጊደቲና፤ ጊደ ኣቲን ና ጊዳናይቲ ሂደታ ቃላን ዮቲቲ ኡቲዳይታ። 9 “ዪዛ ላይሰ ሃኒ ዋዴ ታ ሃ ሲማና፤ ጎራይካ ኔሰ ኣቱማ ና ዬላና” ጌቲቲዲ ኢዛሰ ሂደታ ቃላይ ኣሚቲደሰ። *

10 ሃሳ ፃላሳካ ጊደና። ኢርቢቃ ናይቲ ኣሳዴ ናኮ! ኢዚካ ኑ ኣዋ ዩሳቃ። 11 ሜንቴቲ ዬሌቲዲ ቡሮ ኢታ ዋይኮ ሎፆ ኦሎንታ ዲሺን ያሳ ቆፋይ ሚናና ማላ፣ 12 ኦሶን ጊደንታ ጃይጊዳይሳሬ ጊዲዳ ጊሽ “ባይራይ ካሎዛሰ ሃሪታና” ጌቲቲዲ ኢርቢቃሰ ዮቲቲደሰ። * 13 ሄሲካ “ታ ያቆቤ ደሳዲሰ፤ ኤሳዌ ኢፃዲሰ”

* 9:4 ኬሳ 4:22 * 9:7 ሜጴ 21:12 * 9:9 ሜጴ 18:10 * 9:12 ሜጴ 25:23

ጌቲቲ ካሴ ፃፊቲዳ ማላ ሃኒዳሰ። * 14 ሂሰቲን ኑ ሃሂ ኣይ ገኖ? ያሲ ቤሶንታ ኦጌራ ማዲ ኤሪዜ? ሙሉካ ማዲ ኤሪና። 15 ያሲ ሙሴሰ “ታ ማራና ኮዪዳዳ ማራና፤ ታ ሚሼታና ኮዪዳዳሰካ ሚሼታና” ጌሰ። * 16 ሄሳ ጊሽ ኣሲ ኮይዳ ማላ ጊደንታ ዋይኮ ኣሳ ዳቡራን ጊደንታ ያሲ ማሪዳ ማላ ሃኒሰ።

17 ጌሻ ማፃፋይ ፋርኔ “ታ ዋልቃይ ኔ ቦላ ቤታና ማላኔ ታ ሱንሳ ቢታ ኡባ ቦላ ዮቲታና ማላ ታ ኔና ሃይሳሰ ዳንፋዲሰ” ጌሰ። * 18 ሄሳ ጊሽ ያሲ ማራና ኮዪዳዳ ማሪሰ። ኢዛ ዋዝና ሙሚሳና ኮዪዳዳ ዋዝና ሙሚሴሰ። 19 ኢንቴፊ ኢሳዳይ “ሂሰቲን ሃናይ ሄሳ ማላ ጊዲኮ ኑና ሃኖ ጋካናሰ ኣዛሰ ዋይሲዜ? ጋሶይካ ኢዛ ሼኔ ዲጋና ዳንዳዪዛይ ኦኔ?” ጋዳ ኔ ኦይቸንታ ኣጋካ።

20 ጊደ ኣቲን ያሳሰ ዛር ዛራ ኢሚዛይ ኔ ኦኔ? “ኦሴቲዳ ሚሽ ዛሪዲ ኦሲዳይሳ ኔ ታና ኣዛሰ ሃይሳሰ ኦፋዲ?” ጊ ኤሪዜ? * 21 ኡርቃ ሜዲዳይ ሄ ኡርቃፊ ባጋ ቦንቸሰ ባጋ ቃሴ ጮ ሃራይሶ ኦሶሰ ሜዳናሰ ኢዛ ሼኔ ጊዳኔ?

22 ያሲካ ባ ሃንቆ ቤሳናሲኔ ባ ዋልቃ ኤሪሳናሰ ኮይዲ ኢዛ ሃንቆ ቆንጨሲዛይታ፡ ዳያናሰ ጊጌቲዳይታ ዳይሶንታ ኣጋገኮቹ! 23 ኮይር ቦንቸሰ ጊሲዲ ኢዛ ማርቴሳ ቤሲዛይታሰ ኢዛ ቦንቸ ዲሬቴሳይ ኤሪታና ማላ ኢዚ ኦፋናሳ። 24 ጄይጊዳይይ ኣይሁዳታ ባጋፊ ፃላላ ጊደንታ ኣይዛቤታ ባጋፊ ጊዲዳ ኑናካ ኣሾንታ ጄይጊዳሰ።

25 ሆሴዔ ማፃፋን “ታ ዳሬ ጊደንታይታ ታኒ ታ ዳሬታ፡ ጋ ጄይጋና፤ ደሴቶንታይታ

ኢሰታ ታ ‘ደሴቲዳይታ’ ጋዳ ጄይጋና። *

26 ቃሴካ ‘ኢንቴ ታ ዳሬ ዳኬታ’ ጌቲቲ ዮቲቲዳሶን ሄንካ ‘ኢሰቲ ዳዖ ያሳ ናይታ’ ጌቲቲ ጄይጌታና።” *

27 ኢሳያሲካ ኢሰራዔሌ ናይታ ጊሽ “ኢሰራዔሌ ናይታ ቆዳይ ኣባ ኣጩ ማላ ዳሪኮካ ጉላቲ ፃላላ ኣታና።

28 ጎዳይ ባ ፒርዳ ቢታ ቦላ ኤሌ ፒርዳና” ጊ ዮቲዳሰ። 29 ሄሲካ “ዋጋ ጎዳይ ኑሰ ዜሬሳ ኣሾንታኮ ኑካ ሰደሜ ካታማ ማላኔ

* 9:13 ሚላ 1:2-3 * 9:15 ኬሳ 33:19 * 9:17 ኬሳ 9:16 * 9:20 ኢሳ 29:16፤ 45:9 * 9:25 ሆሴ 2:23 * 9:26 ሆሴ 1:10

ጋሞራ ካታማ ማላ ቆያናሺን” ጌቴቴዲ ካሴ ኢሳያሳ ዲናን
የቴዲይሳ ማላ ሃኒዴሰ። *

ኢስራዔል ናይታኔ ሚሺራቾ ቃላ

30 ሂሰቲን ኑ እይ ጊኖ? እማኖን ቤቴዳ ዒሎቴሳ ዴማናሰ
እይዛቤይ ዳቡሮንታ ዴሚዴሰ። 31 ጊዶ እቲን ዒሎቴሳ ዋጋ
ካሊዛ ኢስራዔል ናይቲ ዴሚቤቴና። 32 ሄሲ አዛሰ ሄሳሶ ሃኒዴ?
ኢሰቲ እማኖን ጊዶንታ ኦሶን ዴማና ካሊዳ ጊሻሳ። ኢሰቲካ ቆዶ
ሹቻን ቆዶቴዳ። 33 ሄሲካ
“ሄኮ አሳ ቆዶዛ ሹቾ ኢሰታ ኩንዲሲዛ ዛላ ዒዮኔ ቦላ ታ ዋላና፤
ኢዛን እማኒዛዴይ ዬላቴና”
ጌቴቴዲ ካሴ ጌኤሻ ማፃፋን ፃፊቴዲይሳ ማላ ሃኒዴሰ።

10

1 ታ ኢሻቶ! ኢስራዔል ናይታ ጊሽ ታ አሞይኔ ታ ያሴ
ዋሲዛይ ኢሰቲ ቆዮንታ አታናሳ። 2 ኢሰቲ ያሳ የዮሰ ሚሹቴዛይታ
ጊዲዲይሳ ታ ኢሰታ ጊሽ ማርካታና ዴንዳያይሰ፤ ኢሰታ ሚሹቴላ
ጊዲኮ ኤራቴላን ጊዴና። 3 ያሴ አሰ ዒሊሲዛ ኦጌ ኤሮንታ ኢጊዲ
ባ ዒሎቴላሰ ኦጌ ካሊዳ እቲን ያሳ ዒሎቴላ ኦጌ ካሊቤቴና።
4 እማኒዛ አሳ ኡባ ዒሊሳናሰ ኪርሰቶሲ ዋጋ ኡባ ፖሊዴሰ።
5 ሙሴይ ዋጋ ባጋራ ቤቴዛ ዒሎቴላ ጊሽ ኤሪሲሹ “ሃይታ
ዋጋታ ፖሊ ኦሊዛዴይ ሃ ዋጋታን ዳና” ጊዛይሳ። * 6 እማኖን
ቤቴዛ ዒሎቴላ ቃሴ ሂዘጌሰ “ኔ ዋዘናራ ፑዴ ሳሎ ኦኔ ኬዛናይ?
ጎፓ” ሄሳሶ ጉሲ ኪርሰቶሳ ሳሎፔ ዲጌ ሃ ዋላና ጉሳ። 7 ዋይኮ
“‘ዲጌ ጨማን ኦኔ ዋላናይ?’ ጎፓ!” ሄሲካ ኪርሰቶሳ ሃይቆፔ
ቡሮ ዴንላና ጉሳ።
8 ጊዶ እቲን ቃላይ እይ ጊዜ? “ቃላይ ኔ አቻን ዴሰ።” ኔ
ዲናኒኔ ኔ ዋዘናን ዴሰ። ኦኒ እማኖ ጊሽ ሳባኪዛ ቃላይ ሃይሳ።
9 ኔኒ ኔ ዲናራ “ዬሱሲ ጎዶ” ጋዳ ማርካቲኮ ያሴ ኢዛ
ሃይቆፔ ዴንላዲይሳ ኔ ዋዘናን ኔ እማኒኮ አታና። 10 ኔኒ ዒላናይ
ዋዘናን እማኒኮኔ አታናይ ኔ ዲናራ ማርካቲና። 11 ጌሻ ማፃፋይ
ጊዛ ማላ “ኢዛን እማኒዛይ ወሪካ ዬላቴና።” * 12 እይሁዳታ
ጊዶኒኔ እይዛቤታ ጊዶን ዴማቴላ ዴና፤ ኢሲ ጎዳይ ኡባሰካ
ጎዳ፤ ኢዛ ዋሲዛይታ ጉጂ አንጂሰ። 13 “ጎዳ ሱንሳ ዒይጊዛይቲ
ወሪካ አታና” ጌቴቴ ጌሻ ማፃፋን ፃፊቴዲዴሰ።

* 9:29 እሳ 1:9 * 10:5 ለዌ 18:5 * 10:11 እሳ 28:16

14 ሂስቲን ኢዛ አማኖንታይቲ ኢዛ ዋዘጊ ያይጋኔ? ቃሴ ኢዛ ጊሽ ሲዮንታ ዲሹ ዋስቲ አማናኔ? ሳባኬይ ባይንዳ ዲሺን ዋስቲ ሲያኔ? 15 ኪቴቶንታ ዋስቲ ሳባካንዳቶ? ሄሲካ “ሚሺራቾ ቃላ ኤኪ ዩዛይታ ዩሲ አይ ማላ ሎዎ” ጌቲቲ ጌሻ ማፃፋን ፃፊቲዳ ማላ ሃሊዴሰ። * 16 ጊዶ አቲን ሲዩዳይቲ ዉሪካ ሚሺራቾ ቃላ ኤኪቤቴና፤ ኢሳያሲ “ጎዶ ኑ ዮቲዳይሳ ኦኒ አማኒዴ?” ጊዳ ማላ ሃሊዴሰ። *

17 ሄሳ ጊሽ አማኖይ ቤቲዛይ ዮቲዛ ቃላ ሲዬላና። ዮቲቲዛ ቃላይካ ኪርሰቶሳ ጊሽ ዮቲዛ ቃላ፤።

18 ጊዶ አቲን አሳይ ሲይቤኔሻ? ጋዳ ታ ኦይቻይሰ፤ ቱማፔ አሳይ ሲይዴሰ፤ ጌሻ ማፃፋን ፃፊቲዳ ማላ “ኢስታ ቃላይ ቢታ ኡባኒኔ

አላማ ጋፃ ጋካናሰ ሲዬቲዴሰ።” *

19 ታ ቃሴካ ኦይቻይሰ፤ ኢሰራዔሌ ናይቲ ቃላ ኤሪቤቴኔሻ? ኮይሮ ሙሴይ ኢስታስ “ታ ዴሬ ጊዶንታይታን ታ ኢስታ አሞሲሳና፤ ዩሺ ቆፖንታ ዴሬታን ታ ኢስታ ዩሎቻና” ጊዴሰ። *

20 ኢሳያሲካ ፃላቴላን “ታና ኮዮንታይታስ ታ ቤታዲሰ፤ ታና ኦይቻንታይታስ ታና ቆንጨሳዲሰ” ጊዴሰ። *

21 ኢሰራዔሌ ጊሽ ቃሴ “ታስ አዛዜቶንታ ዴሬኮኔ ታስ ኤኖ ጎንታ ዴሬኮ ኩማላ ጋላሰ ታ ኩሹ ሚጫዲሰ” ጊሰ። *

11

ፆሲ ኢሰራዔሌ አሳ ሙሌ ዩጊ አጊቤና

1 ሂስቲን ፆሲ ባ ዴሬታ ዩጊ አጊዴ? ጋዳ ታ ኦይቻይሰ፤ ሙሌካ አጊቤና፤ ታካ ታ ባጋራ ቢኒያማ ዛሪኬ፥ አብሪሃማ ዜሬላ ጊዲዳ ኢሰራዔሌ አሳ። * 2 ፆሲ ኮይሮፔ ባ ኤሪዳ ዴሬዛ ዩጊቤና። ኤላሲ ኢሰራዔሌ ናይታ ቦላ ሞቶ ፆሳኮ ዋስቲ ሺሺዳኮኔ ጌሻ ማፃፋይ ኢዛ ጊሽ አይ ጊዛኮ አንቴ ኤሬኬቴ? 3 “ጎዶ! ኢስቲ

* 10:15 ኢሳ 52:7 * 10:16 ኢሳ 53:1 * 10:18 ማዛ 19:4 * 10:19 ዛሬ 32:21 * 10:20 ኢሳ 65:1 * 10:21 ኢሳ 65:2 * 11:1 ፒሊ 3:5

ኔ ናቤታ ዋዲዳ። ኔስ ያርሺዛሶታካ ላሊዳ። ቃሴ ታኒ ታርካ አታዲሰ። ታናካ ዋዳና ጌቲስ” ጌዴስ። *

4 ያሲ ኢዛስ “ባዓሌ ጌቲቲዛ ኤቃሰ ኅይኖንታይታ ላፑን ሺ አስ ታኒ ታሰ አሻዲሰ” ጌ ዛሪዴስ * 5 ሄሳ ማላካ ሃዒ ሃ ዋዴዛንካ ያሳ ኪያቲላን ኢሰራዔሌ አሳፔ ዶሬቲ አቲዳ ጉላቲ ዴቲስ። 6 ሂሰቲን ሄሲ ያሳ ኪያቲላን ጌዲኮ አሳ ኦሶን ጌዴና። አሳ ኦሶን ጌዲዳኮ ያሳ ኪያቲላ ኪያቲላ ጌዴና።

7 ሂሰቲን አይ ጋኔ? ኢሰራዔሌ ናይቲ ሎዔላ ኮዪዳይሳ ዴሚቤቲና። ያሳን ዶሬቲዳይቲ ጌዲኮ ዴሚዳ። ሃንኮ አቲዳይታ ዋዝናይ ሙሚዴስ። 8 ካሴ “ኢሰታ አይፌይ ያሎንታ ማላ፣ ኢሰታ ሃይላይካ ሲዮንታ ማላ ያሲ ሃኖ ጋካናሰ ኢሰታሰ ዶጨሲዛ አያና ኢሚዴስ” ጌቲቲ ጌሻ ማፃፋን ፃፌቲዳ ማላ። * 9 ዳዉቲይካ “ኢሰታ ማዳይ ኢሰታ ኦይከዛ ናርፃኔ ያርዴ፤

ኢሰታሰ ቆጶዲዛዚኔ ቁፃቲ ጌዴ።

10 ኢሰታ አይፌይ ያሎፎ፤ ጎዜቶ፤ ኢሰታ ዘኮይ ሚርናሰ ኩኖ” ጌዴስ።

አይዛቤቲካ አታና

11 እኔ ቃሴ ታ ዛራ ኦይቻይሰ፤ ኢሰራዔሌ አሳይ ናሞዓንላ ኩንዳላፌ ዴንዴኔ? ዴንዳና። ሃራፔካ ኢሰራዔሌ ናይታ ቃናቲሳና ጊሽ ኢሰታ ሞሮ ጋሶን አቶቲላ አይዛቤታሰ ጋኪዴስ። 12 ጌዴ አቲን ቃሴ ኢሰታ ሞሮይ አይዛቤታሰ አንጅ ጌዲዴስ። ኢሰታ ኩንዳላካ ቃሴ አይዛቤታሰ አንጅ ጌዲኮ ኢሰቲ ሲሚ አቲዳኮ አይ ማላ ጌታ አንጅ ጌዳንዴሽን!

13 አይዛቤቶ! ታ ኢንቲሰ ዮታይሰ፣ ታ አይዛቤታሰ ከቲቲዳዴ ጌዲዳ ጊሽ ታ ኦሶዛ ሚናዳ ፖላና። 14 ሄሲካ ታ ባጋ አሳቲ አሞዛና ማላ ዴንፊላዳ ኢሰታፌ ጉላ አሳታ አሻናሰ ኡፋይሳ ኦላይሰ። 15 ያሲ ኢሰታ አጊዳ አይዛቤቲ ያሳራ ጊጊኮ ያሲ ኢሰራዔሌ ናይታ ዛሪዲ ኤከዛ ዋዴ ኢንቲሰ አዚ ሃናና ሚሳቲዜ? ሄሳ ጉሲ “ሃይቆፔ ዴንዲዴስ” ጉሳ ማላ።

16 ኮይሮ ቡኬሶይ ሎ? ጌዲኮ ሃንኮ ኢዛፔ ኦሴቲዛይሰ ዉሪካ ሎ? ጌዴስ። ሄሳሶካ ኢሲ ሚላ ፃጶይ ሎ? ጌዲኮ ሃንኮ ኢዛ ቦላ ዲዛ ሃጋቲካ ሎ? ጌዴቲስ። 17 ከላ ማታን ዲዛ ዋጋራ ሚላ ሃጋታ ማላቲ ኢንቲ ሜቁ ዋዲን ሃንኮ ዋራን ዲዛ ዋጋራ ሚላታ ሚሳቲዛ አይዛቤቲ ኢንቲ ከሹሳን ጌዲዲ ኢንቲ ሃርኔ ኢንቲ አንጅ

* 11:3 1ካዎ 19:10፣14 * 11:4 1ካዎ 19:18 * 11:8 ዛሪ 29:4፤ ኢሳ 29:10

ሻኪ ኤኪዛዳንታ ገዲኮ፤ 18 ሄይታ ሄ ሜቂ ዋዲዳ ሃጋታ ቦላ ኦቶሬቶፋ። ኢንቴ ኢስታ ቦላ ኦቶሬቲኮ ቃሴ ሃኖ ዋዝናን ዋሊቴ። ሄ ሚላ ቶኪዲይ ኔና ገዲካ። ሚላይ ኔና ቶኪዲስ ኣቲን።

19 ሂሰቲኮ “ሄ ሃጋቲ ሜቂ ዋዲዳይ ኦኒ ኢስቲ ኪቾሳን ጌላና ማላሳ” ጎንታ ኣጌኮታ። 20 ቱሙ ገዴታ ሺን ኢስቲ ሜቂዳይ ኣማኖ ፓጩፔ ዳንዲዳይሳና። ኢንቴ ቃስ ኣማኖን ኤቂዴታ። ባቢቴ ኣቲን ኦቶሬቶፍቴ። 21 ያሲ ኮይሮፔ ዲዛ ሃጋታስ ሚሼቶንታዴ ገዲኮ ኢንቴሰካ ሚሼቴና።

22 ሄሳ ገሽ ያሳ ኪያቴሊኔ ኢዛ ሜንፃ ኢታቴላ ኣኔ ፃላ። ኢዛ ሜንፃ ኢታቴላይ ኩንዲዳይታ ቦላ። ኢዛ ኪያቴላይ ቃሴ ኢንቴ ኢዛ ቃዴቴላ ጋርሳን ዲዛ ዋዴ ጋካናስ ፃላላ። ሄሲ ባይንዳ ኣጌኮ ኢንቴካ ቃንፃታና። 23 ኢስቲ ኣማኖንታ ሚኒ ኤቂዳሶፔ ሰሚኮ ካሴ ባሶ ሰሚ ጌላና። ያሲካ ኢስታ ዛርሲ ጌልላና ዳንዳዬሰ። 24 ኢንቴ ባዞ ዋጋራ ሚላፊ ቃንፃቲዳይቲ ካሴ ኢንቴ ሜዴቴላፊ ገደንታ ሎዖ ሚላን ኢንቴ ጌላና ዳንዳዩኮ ኮይሮፔ ባ ሜዴቴላ ሃጋታ ገዲዳይቲ ሄይቲ ካሴ ኢዛ ቦላ ዲዛ ዋጋራ ሚላን ሰሚ ጌሎይ ኢስታስ ዋኒ ሃኔኔ?

ኢሰራዔሌ ኣሳይ ወሪካ ኣታና

25 ታ ኣሻቶ! ኢንቴ ጨንጫ ኣሰ ገዲዳይሳ ኢንቴሰ ሚሳቶንታ ማላ ሃይሳ ገደ ፀራ ዮዖዛ ኢንቴ ኤሮንታ ኣታና ማላ ታ ኮዩኬ። ሄሲካ ኣይዛቤታፔ ፃይጌቲዳይቲ ወሪ ኣማናና ጋካናስ ኢሰራዔሌ ናይታ ዋዝናይ ሙሚዳሰ። 26 ሄሳ ገሽ ኢሰራዔሌ ናይቲ ወሪካ ኣታና። “ኣሺዛዴይ ፃዮኔፔ ያና፤ ያቆቤፔካ ኢታቴላ ዲጋና። * 27 ታኒ ኢስታ ናጋራ ወርሳ ዳይሲዳፔ ጉዬ ታ ኢስታራ ጨቆን ጌሊዛ ቃላይ ሄሳ” ጌቴቲዲ ካሴ ጌሻ ማፃፋን ፃፊቲዳ ማላ ሃኒዳሰ። *

28 ኢንቴሰ ኣይዛቤታስ ሚሺራቾ ቃላይ ጋካና ማላ ኢሰራዔሌ ናይቲ ያሳን ኢፃቲዳ ኣሰ ገዲዳ። ገዲኮካ ካሴ ደሮ ማላ ገዲኮ ባ ኣዋታ ባጋራ ኢስቲ ደሴቲዳይታ። 29 ያሲ ደሪዳፔኔ ባ ኪያቴላ ኢሚዳፔ ጉዬ ባ ኦሊዳ ሚሻን ሰሚዲ ሞዴቴና። 30 ኢንቴካ ካሴ ኣዛዜቶንታይታኮ! ኢስቲ ኣዛዜቶንታ ኢፃን ሃሲ ኢንቴና ማሪዳይሳሉ፤ 31 ያሲ ኢንቴና ማሪዳ ጌደን ኢስቲካ ማሪታና ማላ ሃሲ ኣዛዜቶንታይታ ገዲዳ። 32 ያሲ ወርሲካ ማራናስ ኣሲ ወሪካ ኣዛዜቶንታ ማላ ጎርዲዳሰ።

ያሳ ሳቦ

* 11:26 ኢሳ 59:20 * 11:27 ኤር 31:33-34

33 ያሳ ዲሬቴላይ፡ ኣቶ ኤራቴላይኔ ኢዛ ኤራቴላይ ኣይ ማላ ጪማ! ኢዛ ፒርዳይ ኣይ ማላኮኔ ፓጩፍቴና። ኢዚ ኣቋዳ ጌዶይካ ኤሬቴና። * 34 “ጎዳ ዋዝና ኤራዳይ ኦኔ? ኢዛሰ ዘሪ ኢሚዳይ ኦኔ? 35 ያሲ ዛሪ ኢማና ማላ ኢዛሰ ታልዔ ኢሚዳይ ኦኔ?” ጌቴቲ ዓፌቲዳ ማላ። *

36 ወሪካ ኢዛፍ፡ ኢዛን፡ ኢዛሳ፤ ኢዛሰ ቦንቾይ ሜርናፕ ሜርናሰ ጊዶ! ኣሚን። *

12

ያሳሰ ቤሲዛ ዴዖ ያርሾ

1 ሄሳ ጊሽ ታ ኢሻቶ! ኢንቴ ኣሳቴላ ጌሺኔ ያሴ ኡፋይሲዛ ዴዖ ያርሾ ኦሊዲ ኢንቴ ሺሻና ማላ ታ ኢንቴና ያሳ ቃጴታን ዋሳይሰ። ሄሲካ ዋዝናማ ኣሳ ማላ ኢንቴ ያሳሰ ኦሊዛ ኦሶ።

2 ሎዖ፡ ኡፋይሲዛዚኔ ኩሜላ ጊዲዳ ያሳ ሸኔይ ኣዛኮኔ ኢንቴ ፓጩ ኤራና ማላ ኢንቴ ቆፋን ኦራዲዲ ላሜቲቴ ኣቲን ሃይሳ ኣላሜ ኣሳ ሚሳቶፒቴ።

3 ኢንቴሰ ያሲ ኢሚዳ ኣማኖ ማላ ኢንቴርካ ኢንቴና ፓጩ ያለቴ ኣቲን ሃዒ ዲዛይሳፌ ቦላራ ኢንቴና ቶቂሲ ያሎንታ ማላ ታኒ ታሰ ኢሜቲዳ ያሳ ኪያቴላን ኢንቴና ኢሳ ኢሳ ዙሪይሰ። 4 ኑፔ ኢሲ ኢሲ ኣሳሰ ኢሲ ኣሳቴላ ቦላ ዳር ቢሊቴቲ ዲዛ ማላ ሄይቲካ ሄ ቢሊቴቲ ኢሲ ማላ ኦሶ ኦሎንታይሳ፤ 5 ሄሳላካ ኑኒ ዳርታ ጊዲ ኡቲዲ ኪርሰቶሳን ኢሲ ኣሾ፤ ኑኒ ኢሶይ ኢሳሰ ኣሾ። 6 ኑሰ ኢሜቲዳ ኢሞታ ማላ ዲማ ዲማ ኢሞቴላ ዴሰ። ኢሳዴሰ ቡርፔ ሃናናዝ ዮቶ ጊዲኮ ኢዛዴሰ ኢሜቲዳ ኣማኖ ማላ ዮቶ። 7 ኦሊ ማዲዛዴይ ኦሊ ማዶ፤ ታማርሲዛዴይካ ታማርሶ። 8 ዘሪዛዴይ ጊዲኮ ዘር፤ ባይንዳይታሰ ኢሚዛዴይ ጉጂ ኢሞ። ኣይሲዛዴይ ሚኒ ኣይሶ። ማሪዛዴይካ ኡፋይሳን ማር።

ሲቆ

9 ኢንቴ ሲቆቴላ ቆጴፔ ቆሞን ጊዶ። ኢታ ጊዲዳይሳ ወርሲካ ኢዲቴ። ሎዖ ጊዲዳይሳራ ኢሲፌ ኦይኬቴቴ። 10 ኢንቴ ኢንቴ ጋርሳን ኢሶይ ኢሳራ ኢሻታ ማላ ሎዔላ ሲቆቴቴ። ኢሶይ ኢሳ ባፔ ኣላ ቦንቾዛይታ ጊዲቴ። 11 ጎዳሰ ኦላና ኣያናን ፀጌቲዛይታ ጊዲቴ ኣቲን ሄሳ ሄ ሚኖቴላፌ ጉዬ ጎፒቴ። 12 ሂዶታን ኡፋዬቲዛይታ ጊዲቴ፤ ሜቶ ዳንዳዪቴ፤ ዋሳን ሚኒቴ።

* 11:33 ኢሳ 55:8 * 11:35 ኢዮ 41:11 * 11:36 1ቆር 8:6

13 አማኒሽ ዋዩተዛይታሰ እንቴሰ ዲዛይሳፊ ሻኪ ኢሚቴ። አማላ ሞቢቴ።

14 እንቴና ቃንጊዛይታ አንጂቴ ኣቲን ቃንጎፍቴ። *

15 ኡፋዬተዛይታራ ኡፋዬተቴ፤ ሙዘተዛይታራ ሙዘተቴ።

16 እንቴ እንቴ ጋርሳን ደሴቴላን ዲቴ። ማንቆታራ ኢሲፊቴላን ዳናሰ ኮዪቴ ኣቲን ኦቶሬቶፊቴኔ ጩቁቶፍቴ። *

17 ኦናሰካ ኢታ ጊሽ ኢታ ዛርፒቴ። ኣሳ ኡባ ኣቻን ሎዖ ሚሽ ኦላናሰ ሚኒቴ። 18 እንቴሰ ዳንዳዬተኮ እንቴ እንቴ ባጋራ ኣሳ ኡባራ ሳርን ዲቴ። 19 ታ ሲቆቶ! እንቴ ሃሎ ያሲ ኬሶ ኣቲን እንቴርካ ሃሎ ኬሳፍቴ “ሃሎ ኬሳናይ ታና ጌሰ ጎዳይ” ጌቴቴ ጌሻ ማፃፋን ፃፊተዳሰ። *

20 ሃሎ ኬሳናፔ “ኔ ኔ ሞርኬይ ጋፊኮ ሚዛ፤ ኢዚ ሳሞተኮ ኡሻ፤ ኔ ሄሳላ ኦሊኮ ታማ ቦንቆ ኢዛ ቦላ ኮራሳ” ጌቴቴዲ ጌኤሻ ማፃፋን ፃፊተዳሰ። * 21 ኢታ ሎዖ ኦሶን ያና ኣቲን ኢታን ያኔቶፋ።

13

ዳሬ ኣይሲዛይታሰ ኣዛዜቴላ

1 ኣይ ኣሲካ ባና ኣይሲዛ ዳናታሰ ሃሬታናሰ ቤሴሰ። ያሳፊ አሜቶንታ ዲሺን ዳናቴላ ዳና። ሃዒ ዲዛ ዳናቴ ያሳፊ ዳናቴዳይታ። 2 ሄሳ ጊሽ ዳና ቦላ ማካሊዳይ ያሳ ዋጋ ቦላ ማካሊሰ። ሄ ማካሊዛይቲካ ባ ቦላ ፒርዳ ኤሄቴሰ። 3 ዳሬ ኣይሲዛይቲ ኢታ ኦሊዛይታ ባቢሴቴሰ ኣቲን ሎዖ ኦሊዛይታ ባቢሴቴና። ኔ ዳሬ ኣይሲዛዳሰ ባቦንታ ኣጋና ኮያይ? ሂሰቲኮ ሎዖ ኦላ፤ ኢዚካ ኔና ጋላታና። 4 ኢዚ ኔሰ ሎዖ ኦላናሰ ያሳ ኦሳንቻ። ጊዶ ኣቲን ኔ ኢታ ኦሊዳ ጊዲኮ ኢዛሰ ባባ። ጋሶይካ ኢዚ ማሻ ጮ ሚላ ጊዪቤና፤ ኢዚ ኢታ ኦሊዛዳ ቃፃፃናሰ ያሳ ኦሳንቻ። 5 ሄሳ ጊሽ ኢዛ ቁፃቴሰ ባቦ ያላላ ጊዶንታ ኔ ቆፋንካ ዳናቴዛዳሰ ኣዛዜታናሰ ቤሴሰ።

6 እንቴ ጊራ አሚዛይ ሄሳሳ። ኣይሲዛይታ ሄሳ ሄ ኦሶዛ ቦላ ያሲ ኢሰታ ዋሊዳሰ። 7 ኢሰታፊ ኢሳሰ ኢሳሰ ቤሲዛይሳ አሚቴ። ጊራ አማና ቤሲዛይታሰ ጊራ አሚቴ፤ ቃራዖ ቃንፃናሰ ቤሲዛይታሰ ቃራዖ ቃንፃቴ፤ ባባናሰ ቤሲዛይታሰ ባቢቴ፤ ቦንቻናሰ ቤሲዛይታ ቦንቻቴ።

* 12:14 ማቶ 5:44፤ ሉቃ 6:28 * 12:16 ሉሞ 3:7 * 12:19 ዛሬ 32:35 * 12:20 ሉሞ 25:21-22

ዎዴይ ማቲዳ ጊሽ ኢንቴ ጋርሳን ሲቁቴቴ

8 ኢንቴ ጋርሳን ኢሶይ ኢሳራ ሲቁቴቴፌ ኣቲን ኦና ቦላካ ኣጮይ ደፖ። ኣሰ ሲቁዛ ኣሲ ኢዚ ዎጋ ፖሊደስ። 9 “ላይማቶፓ፣ ዎጶፓ፣ ኣሞቶፋ” ጊዛይቲኔ ሃራ ኣዛዘቲ ዲኮካ “ኣሰ ኡባካ ኔ ማላ ሲቃ” ጊዛ ሃኖ ኢሲ ዎጋን ወሪካ ኩቤቴደስ። * 10 ሲቆይ ኣሳ ቦላ ኢታ ኦፊና፤ ሄሳ ጊሽ ሲቆይ ዎጋ ኡባስ ኩሻ።

11 ሃይሳ ዎዴዛ ጮዲ ያሊዲ ሄሳ ኦፊቴ። ሃዒ ሃና ኢንቴ ጲስኮፌ ዴንዲዛ ዎዴ። ኦ ካሴ ኣማኖሳፔ ሃ ሲሚን ሃዒ ኦስ ኣቲዛ ዎዴይ ማቲደስ። 12 ቃማይ ኣጲን ዎንታና ጌስ። ሄሳ ጊሽ ኣኔ ኦ ጲማ ኦሶ ዎራ ዩጊዲ ፖፖ ኦላ ሚሺ ማይፖስ። 13 ጋላሳራ ሃሙቲዛ ማላ ኣኔ ዎጋራ ሃሙቶስ። ማጉልላኒኔ ማሶን ጊደፖ፤ ላይማ ኣሞኒኔ ላይማን ጊደፖ፤ ቃናቴቴላኒኔ ፓላማን ጊደፖ። 14 ሄሳ ኣጊዲ ዩሱስ ኪርስቶሳ ማይዒቴ። ኣሾ ኣሞ ፖላናስ ቆፖፍቴ።

14

ኣሳ ቦላ ፐርዶፋ

1 ኢንቴ ጋርሳን ኣማኖን ቡሮ ሚኖንታዴ ሺሺ ኤኪቴ ኣቲን ኢዛ ቆፋ ቦላ ፐርዶፍቴ። 2 ኢሲ ኢሲ ኣሲ ቤቲዳይሳ ወርሲ ማናስ ኣማኖይ ዴስ። ቃሴ ኣማኖን ሚኖንታዴይ ኣታኪልቴ ያላላ ሜስ። 3 ቤቲዳይሳ ወርሲ ሚዛዴይ ወርሲ ሞንታዴ ካጶፓ። ሞንታዴይ ቃሴ ሚዛዴ ቦላ ፐርዶፎ። ያሲ ኡባካ ኤኪደስ። 4 ሃንኮ ኦፊዛዴ ቦላ ፐርዲዛዴይ ኔ ኦኔ? ኢዛዴይ ኩንዲኮ ዎይኮ ኤቁኮካ ጎዳሳ። ጎዳይ ኢዛ ኤሳናስ ዳንዳዩዛ ጊሽ ኢዚ ኤቃንደስ።

5 ኢሳዴይ “ጋላሳታፔ ኢሲ ጋላስ ሃራ ጋላሳፌ ኣፊዲ ባሲ ዲማ ጋላስ” ጊ ቆፔስ። ሃራ ኣሲ ቃሴ “ጋላሳቲ ወሪካ ኢሲ ጊና” ጊ ቆፔስ። ኢሲ ኢሲ ኣሲ ባ ዎዝናን ኣሚኒዳ ማላ ኦሶ። 6 ኢሲ ጋላሲ ሃራ ጋላሳፌ ዲማሲ ቆፐዛዴይ ኢዚ ሄሳ ኦፊዛይ ጎዳ ቦንቸሰ ጊዲኮ ሚዛዴይካ ጎዳ ቦንቸሰ ጊዲ ሜስ። ሚዲ ያሴ ጋላቴስ። ሞንታዴይካ ጎዳ ቦንቸሰ ጊዲ ሙስ ኣጌሲኔ ያሳስ ጋላታ ኣሚስ። 7 ኦፔ ኦኒካ ባሲ ዲዛዴይኔ ባፔ ባሲ ሃይቁዛዴይ ዴና። 8 ኦ ዲኮካ ጎዳስ ደስ። ሃይቁኮካ ጎዳስ ሃይቆስ። ሄሳ ጊሽ ዲኮካ ዎይኮ ሃይቁኮ ኦ ጎዳሳ።

* 13:9 ኬሳ 20:14-15፤ 20:13፣17፤ ዛሬ 5:17-19፣21፤ ለዌ 19:18

9 ሄሳ ጊሽ ሃይቁዳይታሲኔ ፓፃ ዲዛይታሰ ጎዳ ጊዳናሰ ከርሰቶሲ ሃይቁዲ ሃይቆፔ ፓፂ ዳንዲዳሰ። 10 ሂሰቲን ኔ ኣዛሰ ኔ ኣሻ ቦላ ፐርዳይ? ኣዛሰ ኔ ኣሻ ሌቃይ? ኑ ዉሪካ ያሳ ፐርዳ ዎምቦራ ሲንሐ ሽቆሰ ዶሰ። *

11 “ታ ፓፃ ዳይሰ።
ጉልባቲይ ዉሪካ ታሰ ጉልባታና።
ኢንፃርሲ ዉሪ ያሳሰ ማርካታና”

ጌቲቲ ካሴ ጌሻ ማፃፋን ፃፊቲዳሰ። * 12 ሄሳ ጊሽ ኑኒ ኢሲ ኢሲ ኣሲ ያሳ ሲንሐ ሽቁዲ ኑ ኦሶ ጊሽ ኢዛሰ ዛር ኢማና።

13 ሄሳ ጊሽ ኑኒ ኑ ጋርሳን ኢሶይ ኢሳ ቦላ ፐርዳናፔ ኣኔ ናጌቶሰ። ሄሳ ኣገዲ ኑ ኣሻሰ ቆጶ ጊዲዛይሳ ዎይኮ ኢዛ ኦይኪዛ ናርፃ ዎሉንታ ማላ ኣኔ ኑ ናጌቶሰ። 14 ታኒ ጎዳ ዬሱሳን ኣማናዳ ሚዛ ካላን ቱናይ ባይንዳይሳ ኤራዲሰ። ጊዶ ኣቲን ኢሳዳይ ኢሲ ሚሽ ቱና ጊ ቆፐኮ ሄ ሚሻይ ኢዛዳሲ ቱና። 15 ኔኒ ኔ ኣሻ ሚዛ ካላ ጌዶን ቆጶ ጊዲኮ ሲቆን ሲሜሬታባካ። ከርሰቶሲ ኢዛ ጊሽ ሃይቁዳ ኔ ኣሻ ኔ ሚዛ ካላ ጋሶን ዎጶፓ። 16 ኢንቲ ሎዎ ጊዲ ቆፐዛ ሚሽ ኢታ ጌቲታና ማላ ኦሎፍቲ። 17 ያሳ ካዎቴሊ ያሎ ኣያናን ቤቲዳ ያሎቴላ፣ ሳርቴሊኔ ኡፋይሳፊ ኣቲን ሙሳ ዮዮኔ ኡሻ ዮዮ ጊዳና። 18 ሃይሳሎ ከርሰቶሳሰ ኦሊዛዳይ ያሴ ኡፋይሴሲኔ ኣሳ ኣቻንካ ጋላቴቲሰ።

19 ሄሳ ጊሽ ሳርቴሊ ቤቲዛ ኦጌኔ ኑኒ ኑ ጋርሳን ሎዎናሰ ቤሲዛ ኦጌ ኣኔ ኮዮሰ። 20 ኑኒ ሚዛ ካላ ጊሽ ጊዲ ያሳ ኦሶ ኣኔ ላሎኮ። ካሊ ዉሪካ ጌሻ። ጊዶ ኣቲን ሃራ ኣሳሰ ቆጶ ጊዲዛ ካሐ ሙሲ ባላ ኦሶ። 21 ኔ ኣሻሰ ቆጶ ጊዲዛዚ ጊዲኮ ኣሻካ ማናፔኔ ዎይኔ ጫጃ ኡያናፔ ዎይኮ ኣይ ሚሺካ ኔ ኦሶንታ ኣገኮ ሎዎ።

22 ሄሳ ጊሽ፣ ሃይታንታ ሚሳቲዛ ሚሻታሰ ኔሰ ዲዛ ኣማናይ ኔ ጊዶኒኔ ያሳ ጊዶን ዳዎ። “ሃይሲ ሊኬኮ” ጊዲ ኣማናን ኤኪዳ ሚሻን ባርካ ባ ቦላ ፐርዶንታዳይ ኢዛዳይ ኣንጃቲዳዳ። 23 ጊዶ ኣቲን ዎዝናራ ሲጂሽ ሚኮ ኢዚ ኣማናን ሞንታ ጊሽ ኢዛ ቦላ ፐርዳቲዳሰ። ኣማናን ኦሶንታዚ ዉሪካ ናጋራ።

15

1 ኑኒ ኣማናን ሚኒዳይቲ ሃንኮ ኣማናን ሚናታይታ ሜቶ ቶካናሰ ቤሴሰ ኣቲን ኑ ፃላ ኡፋይቲዛይታ ጊዳናሰ ቤሴና። 2 ኑኒ ዉሪካ ሃራ ኣሲ ባ ኣማናን ሚናና ማላ ኢዛ ጎሲዛዚኔ ኡፋይሲዛ

* 14:10 2ቆር 5:10 * 14:11 ኢሳ 45:23

ሚሽ ኣኔ ኦሎስ። 3 ኪርሰቶሲ ባና ኡፋይሲቤና፤ ሃራፔካ “ኣሳይ ኔና ጫዩዳ ጫሻይ ታና ጋኪዳስ” ጌቴቲ ካሴ ጌሻ ማፃፋን ፃፊቲዳይሲ ፖሌቲዳስ። * 4 ኑኒ ጌሻ ማፃፋታፔ ዳሚዛ ዳንዳያይኔ ሚናቴሲ ኑስ ዳና ማላ ኮይሮፔ ፃፊቲዳይሲ ዉሪካ ኑ ኢዛፔ ኑስ ቲሚርቴ ዳማና ማላ ፃፊቲዳስ።

5 ሚናቴሲኔ ዳንዳያ ኢሚዛ ፆሲ ኢንቴ ዩሱስ ኪርሰቶሳ ካሊሺን ኢንቴስ ኢንቴ ጊዶን ኣያና ኢሲፊቴላ ኢሞ። 6 ሄሲካ ኢንቴ ኢሲ ዋዝናኒኔ ኢሲ ዱና ጊዲዲ ኑ ጎዳ ዩሱስ ኪርሰቶሳ ኣዋ ፆሳ ቦንቻናሳ።

ሚሺራቾ ቃላይ ኣማናንታ ዳሬታስ ሳባኬቲዳስ

7 ሄሳ ጊሽ ፆሲ ኢንቴና ፆሳ ቦንቻን ሞኪ ኤኪዳ ማላ ኢንቴካ ኢሲይ ኢሳ ኡፋይሳን ሞኪ ኤኪቴ። 8 ካሴ ኣዋታስ ኢሜቲዳ ሂዶታ ቃላ ፖላናስ ፆሳ ቱማቴሲ ኤሬታና ማላ ኪርሰቶሲ ኣይሁዳታስ ኦሊዛይ ጊዲዳይሳ ታ ኢንቴስ ፆታይስ። 9 ሄሳላካ ኣይዛቤቲ ኢዛ ማሮቴሳ ጊሽ ፆሴ ጋላታና ማላ፤ ሄሲካ

“ታ ኔና ዳሬ ጊዶን ጋላታና፤
ኔ ሱንሳስካ ጋላታ ዩላ ዩፃና”
ጌቴቲ ጌሻ ማፃፋን ፃፊቲዳ ማላ። *

10 ቃሴካ
“ኣይዛቤቶ!
ኢንቴካ ፆሳ ዳሬታራ ኡፋይቴቲ”

ጌቴቲ ጌሻ ማፃፋን ፃፊቲዳስ። *

11 ናሞሳንሶካ
“ኣይዛቤቲ ኢንቴ ዉሪካ ጎዳ ጋላቲቴ፤
ዳሬይ ዉሪ ኢዛ ሳቢቴ”

ጌቴቲ ጌሻ ማፃፋን ፃፊቲዳስ። *

12 ሄሳላ ኢሳያሳን
“ባ ዳሬ ኣሳ ቦላ ካዋቲዛ ኢሴዬ ናይ ያና።
ኣላሜ ኣሳ ኣይሲዛይይ ዳንዳና፤
ኢስቲካ ኢዛን ኡፋይታና” ጌስ። *

13 ኢንቴ ኢዛን ኣማኒዛ ጊሽ ሂዶታ ፆሲ ኢንቴናን ኡፋይሲኔ ሳርቴላ ኩንሶ። ሄሲካ ዪሎ ኣያና ዋልቃ ሂዶታ ኢንቴስ ዳራናሳ።

ኣይዛቤታስ ኦሳንቻ ጊዲዳ ጳዉሎሳ

* 15:3 ማዛ 69:9 * 15:9 2ሳሜ 22:50፤ ማዛ 18:49 * 15:10 ዛሬ 32:43 * 15:11 ማዛ 117:1 * 15:12 ኢሳ 11:10

14 ታ ኢሻቶ! ኢንቴ ሎዔቴላን፤ ኤራቴላ ኡባን ኩሚዳይታኔ ሃራታ ዞራናስ ኤራይ ዲዛይታ ገዲዳይሳ ታ ኣዳፌ ሻካ ኤራዲስ። 15 ታ ያሳፌ ኤኪዳ ኢሞቴላ ገና ቃሴካ ኢንቴና ቆፊሳናስ ኢሲ ኢሲ ዮገታ ፃላቴላን ኢንቴስ ፃፋዲስ። 16 ሄሳ ሄ ኪያቴላይ ኢሜቴዳይ ታኒ ያሳ ሚሺራቾ ቃላ ሃንኮ ዴሬታስ ዮታና ማላ፤ ቃሴካ ቄሴ ማላ ገዲዳ ዩሱስ ኪርሰቶሳስ ኦላናሳ፤ ሄሳ ገሽ ሃንኮ ዴሬ ኣሳይ ዒሎ ኣያናን ዲማቴዲ ያሴ ኡፋይሲዛ ያርሾ ገዲዲ ሺቃና ማላ ኦላይስ።

17 ሄሳ ታኒ ያሳስ ኦሊዛ ገሽ ዩሱስ ኪርሰቶሳን ጨቁታይስ። 18 ታ ዮቴዳይሳኒኔ ታ ኦሊዳይሳን ሃንኮ ዴሬ ኣሳይ ያሳስ ኣዛዜታና ማላ ኪርሰቶሲ ታናን ገዲዲ ኦሊዳዛ፤ ኣቴን ሃራ ሃሳያና ፃሊኬ። 19 ሄሲካ ሃኒዳይ ዒሎ ኣያና ዋልቃን ማላታታ ባጋራ ሃኒዴስ። ሄሳ ማላንካ ዩራሳላሜ፤ ኢልዋቆሬ ጋካናስ ታ ኪርሰቶሳ ሚሺራቾ ቃላ ሳባካዲስ።

20 ሃራ ኣሲ ካሴ ኦሊዳሶን ታ ጌሎንታ ማላ ጋዳ ካሴ ኪርሰቶሳ ሱንሳ ያይጌቴ ኤርንታሶን ሚሺራቾ ቃላ ሳባካናይሲ ታስ ኣሞ። 21 ሃራፔካ “ኢዛ ገሽ ኢስታስ ዮቴቶንታይቴ ኢዛ ቤያና፤ ሲዩ ኤርንታይቴ ሃሳዓና”

ጌቴቴ ካሴ ጌሻ ማፃፋን ፃፊቴዳ ማላ ሃኒዴስ። *

22 ሄሳ ጌዶን ታ ኢንቴኮ ቦንታ ማላ ዳሮ ዋዴ ዲጌታዲስ።

ኦሮሜ ቤያናስ ጳውሎሳ ጊጌቴላ

* 23 ሃዒ ቃስ ታስ ሃን ኦሶይ ባይንዳ ገሽ ዳሮ ላይላታ፤ ሃ ሲሚን ኢንቴና ቤያናስ ታ ዳሮ ላሞታዲስ። 24 ሃይሳ ታ ቆፋ ታኒ ኢስፔኔ ቢዛ ዋዴ ፖላናስ ቆፓይስ። ሄራ ኣሳሽ ኢንቴና ቤያናሲኔ ኢንቴናራ ጉላ ዋዴ ጋሞዓዳ ላሞታ ኣሊዳ ማላ ኢንቴ ታና ማዳና ጋዳ ሃዶታ ኣላይስ።

25 ሃዒ ቃስ ኣሚኒዛይታስ ኢሜቴዛ ማዶ ገሽ ኤካዳ ዩራሳላሜ ባይስ። 26 ጋሶይካ ማቁዶኒያኒኔ ኣካያን ዲዛ ማንቆታ ማዳና ዴንዲዴስ። * 27 ሃይሳ ሃ ማዶዛ ኢስቴ ባ ዶሳን ኢሚዳይ ኢስቴ ኦላናስ ቤሲዛ ገሻሳ፤ ኣይዛቤቴ ኣይሁዳታራ ኢሲፌ ኣያና ኣንጅ ኤኪዛይታ ገዲኮ ኢስቴካ ባሲ ዲዛ ቢታ ኣንጅን ኣይሁዳታ ማዳናስ ቤሴስ። * 28 ሄሳ ገሽ ሃይሳ ሽቁዳ ማዶ ሚሻ ዩራሳላሜ

* 15:21 ኢሳ 52:15 * 15:22 ኦሮ 1:13 * 15:26 1ቆር 16:1-4
* 15:27 1ቆር 9:11

አሚዳፔ ጉዬ አንቴ አቻን ታ ኢሰፔኔ ባና። 29 ታ ሄ አንቴኮ ባሼ አንቴሰ ኪርሰቶሳ አንጆ ኩንላ ኤካ ባናይሳ ታ ኤራይሰ።

30 ታ አሻቶ! ታኒ ያሳ ዋሳን ባጭተዛ ማላ አንቴካ ታናራ ባጭታና ማላ ታ አንቴና ጎዳ ዬሱሰ ኪርሰቶሳኒኔ ጂሎ ኣያና ሲቆን ዋሳይሰ። 31 ታኒ ዩሁዳን ዲዛ አማኖንታ ኣሳ ኩሼፔ አታና ማላኔ ዬሩሳላሜን ዲዛ ታ ኦሶይካ ሄን አማኒዛይታ አቻን ኤኬታና ማላ ታሰ ዋሲቴ። 32 ሄሲካ ያሳ ሼኔ ማላ ሄ አንቴኮ ታ ኡፋይሳራ ባና ማላኔ አንቴናራ ኢሲፌ ሼሞፓና ማላ። 33 ሳርቴላ ጎዳይ አንቴናራ ኡባታራ ጊዶ። አሚን።

16

ሳሮካ

1 ከንኪራዖሴ ዋሳ ኬላን ኦሲዛ አማኔቲዳ ሚቹዮ ፔቤኖ አንቴሰ ሃዳራ ጋይሰ። 2 አማኒዛ ኣሳሰ ቤሲዛ ሞኮ አንቴ ኢዞ ጎዳ ሱንላን ሞኪ ኤካና ማላኔ ኢዛ አንቴፌ ኮዩዛ ኣይ ሚሻንካ አንቴ ኢዞ ማዳና ማላ ታ አንቴና ቆፊሳይሰ።

3 ካሴ ታናራ ጎዳ ዬሱሰ ኪርሰቶሳሰ ኢሲፌ ኦሲዳ ጰርሲቁላሰኔ ኣቁላሰ ታ ሳሮካ ጋላቴ። * 4 ኢሰቲ ታ ጊሽ ሃይቃና ጋካናሰ ባና ኣላ አሚዳ፤ ታና ፃላላ ጊዶንታ ኣይዛቤታፔ አማኒዳይቲካ ኢሰታ ጋላቴቲሰ። 5 ኢሰታ ኬላን ዲዛ አማኒዛ ኣሳካ ሳሮ ጊቴ። ኢሲያፔ ኮይሮ ኪርሰቶሳን አማኒዳ ታ ሲቆዛ ኤጴይዖሴ ሳሮ ጊቴ። 6 አንቴሰ ዳሮ ዳቡሪዳሮ ማራሞ ሳሮ ጊቴ። 7 ታናራ ኢሲፌ ቃሼቲዳ ኣንዲራቆኔኔ ዩኒያሴ ሳሮ ጊቴ። ሄይታንቲ ሃሞሬታ ጋርሳን ሎዖ ሱንላራ ዲዛይታኔ ኪርሰቶሳ ታፔ ካሴ አማኒዳይታ። *

8 ታኒ ጎዳ ባጋራ ዳሮ ሲቁዛ ጰሊያዖኔ ሳሮ ጊቴ። 9 ኪርሰቶሳ ኦሶ ታናራ ኢሲፌ ኦሲዛ አሮባኖኔኔ ታ ሲቁዛ ሴንፃኬካ ሳሮ ጊቴ። 10 ኪርሰቶሳን ኢዛ አማኖይ ፓጩቲዳ ጋላቴቲዳ ኤጴይኔሴሰ ታ ሳሮካ ጋላቴ። ኣርሲፃባሎሶ ኣሳሰካ ታ ሳሮካ ጋላቴ። 11 ታ ዳቦ ሄሮዲያና ሳሮ ጊቴ። ጎዳን ዲዛ ኒሪቃሶሶ ኣሳ ሳሮ ጊቴ።

12 ጎዳን ጊዲዲ ሚኖቴላን ኦሲዛ ማጫሳታ ቲሪፊሞኖኔ ፃሮፊሞኖ ሳሮ ጊቴ። ጎዳሰ ኦሶን ዳሮ ዳቡሪዳሪሰ ኪርሰቶሳን ታኒ ኢዞ ሲቁዛ ፃርሲዲሰ ታ ሳሮካ ጋላቴ። 13 ጎዳን ዶሬቲዳ ሩፎኔሰ፤ ታሲኔ ኢዛሰ ኣዮ ጊዲዳሪሰ ታ ሳሮካ ዮቲቴ። * 14 ኣሰቁርኔሲ፤

* 16:3 ሃሞ 18:2 * 16:7 ዩኒያሴ ኢሲ ኢሲ ጌሻ ማፃፋቲ ዮሊያ ጌቲሰ።

* 16:13 ማር 15:21

አፊላሶኔስ፣ ሄሮሜኔስ፣ ጳዊሮባኔስ፣ ሄሮማኔስኔ ኢስታራ ዲዛ ኢሻታ ኡባታስ ታ ሳሮካ ጋሏቴ። 15 ፊሌጎኔስ፣ ዩሊያስ፣ ኔሪያሲኔ ኢዛ ሚቼይስ ሄሳሎካ አልጾኔስ፣ ኢስታራ ዲዛ አማኒዛይታስካ ታ ሳሮካ ጋሏቴ።

16 ኢሶይ ኢሳ ዬሪ ዬር ኤኪዲ ሳሮኬቲቴ። ኪርሰቶሳን አማኒዛ ዋሳ ኬላ አሳይ ወሪካ ኢንቴና ሳሮ ጌስ።

17 ታ ኢሻቶ! አሳ ጋርሳን ሻኬቴሌ ሜዲዛይታፔኔ ኢንቴ ታማሪዳ ቲሚርታ ኤኮንታ ኢጾን ኢንቴስ ቆጶ ጊዲዛ አሳታፔ ኢንቴ ናጌቲቴ። 18 ሄይታንታ ማላ አሳቲ ዩሱስ ኪርሰቶሳስ ኦሊዛይታ ጊዶንታ ባ ቃንላ ካላ ጊሽ ኦሊዛይታ። ሹጎ ቃላራ ሃሳያኒኔ ዋዘና ኪያ አሳታ ባሌሌቴስ። 19 ኢንቴ ሚሺራቾ ቃላስ አዛዜቲዛይታ ጊዲዳይሳ አሲ ወሪ ሲይዴስ። ሄሲካ ታና ዳሮ ኡፋይሲዴስ። ጊዲኮካ ኢንቴ ሎጾ ሃናስ ጨንጫታ ቃሴ ኢታ ኦሶስ ኤያታ ጊዳና ማላ ታ ኮያይስ። 20 ሳሮቴላ ጎዳይ ፃላዔ ኤሶን ኢንቴ ቶሆ ጋርስ አሏ ዲንጩራፋና።

ጎዳ ዩሱስ ኪርሰቶሳ ኪያቴሌ ኢንቴናራ ጊዶ።

21 ታናራ ኢሲፌ ኦሊዛ ጂምቶሲ ቃሴካ ታ ዳቦ ሉቂዮሲ፣ ኢያሶኔይኔ ሱሲጶዊሮሲ ኢንቴና ሳሮ ሳሮ ጌቲስ። *

22 ሃይሳ ከታ ፃፊዳይ ታኒ ፃሪዲዮሲ ኢንቴና ጎዳ ሱንላን ሳሮ ጋይስ።

23 ታኒ ሃይሳን ዲዛ ኩሜላ ዋሳ ኬላ አሳይ ሞኪ ኤኪዛ ጋዬዮሲካ ኢንቴና ሳሮ ጌስ፤ ካታማ ሚሻ ኦይኪዛ ኤሪስጾሲኔ ኑ ኢሻ ቆዓዊሮሲ ኢንቴና ሳሮ ጌቲስ። * 24 ጎዳ ዩሱስ ኪርሰቶሳ ኪያቴሌ ኢንቴናራ ኡባታራ ጊዶ። አሚን።

25 ታኒ ዮቲዛ ሚሺራቾ ቃላይ ዩሱስ ኪርሰቶሳ ጊሽ ዮቴቲዛ ከታይኔ ቤኒ ዋዴፔ ዶሚዲ ቆታን ጋምባዲ ሃባ ቃሴ ቆንጨዳ ቱማ ፀራ ባጋራ ኢዚ ኢንቴና አማኖን ኤሳናስ ዳንዳዬስ። 26 ሃባ ቃሴ ሃይሲ ቱማይ ቆንጨዳ። ሜርና ያሳ አዛዞን ወሪካ አማኒዲ አዛዜታና ማላ ናቤታ ማፃፋ ባጋራ ዴሬቲ ወሪካ ኢዛ ኤራና ማላ ሃኒዴስ።

27 ኢዚ ፃላላ ኤራ ጊዲዳ ጎዳስ ዩሱስ ኪርሰቶሳ ባጋራ ሜርና ቦንቾይ ኢዛስ ጊዶ። አሚን።

* 16:21 ሃዋ 16:1 * 16:23 ሃዋ 19:29፤ 1ቆሮ 1:14፤ 2ዲሞ 4:20

ኦሪሳ ጩቆ ማፃፋ ንሞሉ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
dffa0cbb-5f77-5875-bf95-f4176677af45